



C40-4514

丁巳上座請大藏及有
家書置之武州紫雲山
我微笑塔院真府中永
為學者不敢許出院內
雷山二世鐵牛機譯



B 64853

大方廣佛華嚴經卷第三十六

唐罽賓國三藏般若奉詔譯

入不思議解脫境界普賢行願品之三十六

爾時彌勒菩薩復告善財童子言善男子譬如有人得無畏藥離五恐怖何等爲五所謂火不能燒毒不能中刀不能傷水不能漂煙不能熏菩薩摩訶薩亦復如是得一切智菩提心藥離五怖畏何等爲五不爲一切三毒火燒五欲毒中惑刀不傷有流不漂諸覺觀煙不能熏害善男子譬如有人得解脫藥終無橫難菩薩摩訶薩亦復如是得菩提心解脫智藥永

離一切生死橫難善男子譬如有人持摩訶應伽藥隨其方所一切毒蛇聞此藥氣卽皆遠去菩薩摩訶薩亦復如是持菩提心大應伽藥一切煩惱諸惡毒蛇聞其氣者悉皆散滅善男子譬如有人持無能勝藥一切冤敵無能勝者菩薩摩訶薩亦復如是持菩提心無能勝藥悉能降伏一切魔軍善男子譬如有人持毗笈摩藥能令毒箭自然墮落菩薩摩訶薩亦復如是持菩提心毗笈摩藥令貪瞋癡諸邪見箭自然墮落善男子譬如有人持善見藥能除一切所有諸病菩薩摩訶薩亦復如是持菩提心善見藥王悉

除一切諸煩惱病善男子如有藥樹名珊瑚那有取其皮以塗瘡者瘡卽除愈平復如故亦無瘢痕然其樹皮隨取隨生終不可盡菩薩摩訶薩從菩提心生大智樹亦復如是若有得見而生信者煩惱業瘡悉得銷滅一切智樹初無所損善男子如有藥樹名成就根以其力故令閻浮提一切樹根枝葉花果增長成就菩薩摩訶薩菩提心樹亦復如是以勝威力能令一切聲聞獨覺學無學等及諸菩薩所有善根增長成就善男子譬如有人藥名阿藍婆若用塗身身之與心咸有堪能菩薩摩訶薩得菩提心阿藍婆藥亦

復如是令其身心有勝堪能增長善法善男子譬如
有人得念力藥能令其心念力清淨菩薩摩訶薩亦
復如是得菩提心念力妙藥心無障礙念力清淨善
男子譬如有人執翳形藥一切世間人及非人悉不能見菩薩摩訶薩持
菩提心翳形妙藥亦復如是於諸境界種種遊行一
切諸魔不能得見善男子如海有珠名普集衆寶此
珠若在一切衆寶常不散失假使劫火焚燒世間能
令此海減於一滴無有是處況至乾竭菩薩摩訶薩
菩提心珠亦復如是住於菩薩一切智大願海中
若常憶持不令退失能壞菩薩一善根者終無是處
若退其心捨一切智一切善法卽皆散滅善男子如
有摩尼名普集光明有以此珠瓔珞其身映蔽一切
寶莊嚴具所有光明悉皆不現菩薩摩訶薩菩提心
寶亦復如是莊嚴心性映蔽一切聲聞獨覺所有心
寶諸莊嚴具悉無光彩善男子如有珠寶名曰水清
若以此珠置濁水中以珠威力水卽澄清菩薩摩訶
薩菩提心珠亦復如是能清一切煩惱垢濁善男子

譬如有人得住水寶繫其身上入大海中自在遊行
不爲水害菩薩摩訶薩亦復如是得菩提心一切智
智住水妙寶入於一切生死海中遊戲自在終不沉
溺善男子譬如有人得龍寶珠持入龍宮遊止大海
以珠威力一切龍蛇及諸水族悉不能害菩薩摩訶
薩亦復如是得菩提心一切智智大龍寶珠入於欲
界癡愛水中惑業龍蛇不能爲害善男子譬如帝釋
著摩尼冠莊嚴其頂映蔽一切諸餘天衆菩薩摩訶
薩亦復如是著菩提心一切智智大願寶冠繫其心
頂超過一切三界衆生善男子譬如有人得如意珠
除滅一切貧窮之苦菩薩摩訶薩亦復如是得菩提
心一切智智如意寶珠出生菩薩善法資具遠離一
切邪命怖畏善男子譬如有人得日精珠持向日光
而生於火菩薩摩訶薩亦復如是得菩提心一切智
性日精寶珠持向智光而生智火善男子譬如有人
得月愛珠持向月光而生於水菩薩摩訶薩亦復如
是得菩提心月精寶珠持此心珠鑒廻向光而生一
切善根願水善男子譬如龍王首戴如意摩尼寶冠
遠離一切怨敵怖畏菩薩摩訶薩亦復如是著菩提
心大悲寶冠遠離一切惡道諸難善男子如有寶珠

名一切世間莊嚴藏若有得者令其所欲悉得充滿而此寶珠用無窮盡體不損滅菩薩摩訶薩菩提心寶亦復如是若有得者令其所願悉得圓滿而菩提心用不窮盡體無損滅善男子如轉輪王有摩尼寶置於宮中放大光明破一切闇菩薩摩訶薩亦復如是以菩提心一切智智大摩尼寶住於欲界放大智光悉破諸趣無明黑闇善男子譬如帝青大摩尼寶若有爲此光明所觸卽同其色菩薩摩訶薩發菩提心一切智寶亦復如是觀察諸法廻向善根趣一切智靡不卽同一切智智菩提心色善男子如瑠璃寶於百千歲處不淨中不爲梟穢之所染著最極無垢性本淨故菩薩摩訶薩發菩提心一切智寶亦復如是於百千劫住欲界中不爲欲界過患所染最極無垢如法界性本清淨故善男子譬如有寶名淨光明悉能映蔽一切寶色菩薩摩訶薩發菩提心一切智寶亦復如是悉能映蔽一切凡夫有學無學三乘功德善男子譬如寶名爲火焰悉能除滅一切闇冥菩薩摩訶薩一切智寶亦復如是觀行相應能滅一切無明黑闇善男子譬如海中有無價寶商人採得船載入城其諸摩尼百千萬種光色價直無與等者

菩薩摩訶薩菩提心寶亦復如是住於生死大海之中乘大願船深心相續入解脫城一切聲聞及辟支佛所有功德無能及者善男子如有寶珠名自在王處閻浮洲去日月輪四萬由旬日月宮中所有莊嚴其珠影現悉皆具足菩薩摩訶薩發菩提心一切智清淨功德自在王寶亦復如是住生死中照法界空佛智日月一切功德清淨境界影像莊嚴悉於中現善男子如有寶珠名自在王日月光明所照之處一切財寶衣服等物所有價直悉不能及菩薩摩訶薩發菩提心自在王寶亦復如是一切智光所照之處三世所有天人二乘種種善根漏無漏法一切功德皆不能及善男子譬如海中有摩尼寶名曰海藏普現海中諸莊嚴事菩薩摩訶薩菩提心寶亦復如是普能顯現一切智海諸莊嚴事善男子譬如天上閻浮檀金唯除心王大摩尼寶餘無及者菩薩摩訶薩發菩提心閻浮檀金亦復如是除一切智心王大寶餘無及者善男子譬如有人善調龍法於諸龍中而得自在菩薩摩訶薩亦復如是發菩提心得一切智善調龍法於諸一切煩惱龍中而得自在善男子譬如勇士被執鎧仗一切怨敵無能降伏菩薩摩訶

薩亦復如是被執菩提大心鎧仗一切業惑諸惡怨
敵無能摧伏無能屈者善男子譬如天上白栴檀香
若燒一炷其香普熏小千世界三千世界滿中珍寶
所有價直皆不能及菩薩摩訶薩菩提心香亦復如
是一念功德普熏法界聲聞獨覺一切功德皆所不
及善男子如白栴檀若以塗身悉能除滅一切熱惱
令其身心普得清涼菩薩摩訶薩菩提心香亦復如
是發一切智普熏身心能除一切虛妄分別貪瞋癡
等諸惑熱惱令其具足智慧清涼善男子如須彌山
衆生近者卽同其色菩薩摩訶薩菩提心山亦復如
是若有近者悉得同其一切智色善男子譬如波利
質多羅樹拘鞞陀羅樹其皮香氣閻浮提中所有諸
華若婆師迦若瞻博迦若蘇摩那及鬱金等如是諸
華所有香氣皆不能及菩薩摩訶薩菩提心樹亦復
如是所發大願功德之香一切二乘無漏戒定智慧
解脫解脫知見諸功德香悉不能及善男子譬如波
利質多羅樹拘鞞陀羅樹雖未開華應知卽是無量
諸華出生之處菩薩摩訶薩菩提心樹亦復如是雖
未開發一切智華應知卽是無數人天有漏無漏衆
菩提華所生之處善男子譬如波利質多羅華一日

熏衣所出香氣贍博迦華婆利師迦華蘇摩那華雖千歲熏亦不能及菩薩摩訶薩菩提心華亦復如是一生所熏諸功德香普徹十方一切佛所一切二乘無漏功德百千劫熏所不能及善男子如海島中生椰子樹根莖枝葉及以華果一切衆生恒取受用無時暫歇菩薩摩訶薩菩提心樹亦復如是始從發起悲願之心乃至成佛正法住世長時利益一切世間無有間息善男子如有藥汁名訶摘迦人或得之以其一兩變千兩銅悉成真金非千兩銅能變此藥菩薩摩訶薩亦復如是以菩提心廻向智藥普變一切業惑等法悉使成於一切智相非業惑等能變其心善男子如微小火投乾草積隨所焚燒其焰轉熾菩薩摩訶薩菩提心火亦復如是隨其所緣善惡法聚能令智焰展轉增盛善男子譬如一燈然百千燈其本一燈無滅無盡菩薩摩訶薩菩提心燈亦復如是普然三世諸佛智燈而其心燈無滅無盡善男子譬如一燈入於闇室百年暗悉能破盡發起光明普照一切菩薩摩訶薩菩提心燈亦復如是入衆生心無明闇室能滅無量百千萬億不可說劫積集一切諸業煩惱種種障礙發生一切大智光明善男子譬如

如燈炷隨其大小而發光明若益膏油明終不絕菩薩摩訶薩菩提心燈亦復如是大願爲炷發智慧光照明法界益大悲油敎化衆生莊嚴國土施作佛事現大威德無有休息善男子譬如他化自在天王冠闍浮檀真金天冠欲界天子諸莊嚴具所有光明無能映奪一切威力皆不能及菩薩摩訶薩亦復如是冠菩提心一切智寶大願天冠凡夫二乘所有功德皆不能及善男子如師子王哮吼之時師子兒聞皆增勇健餘獸聞之脂血銷耗卽皆竄伏佛師子王菩提哮吼一切智聲應知亦爾諸菩薩聞養育法身增長功德其餘一切邪執衆生聞皆退散如冰消釋善男子譬如有人以師子筋而爲樂絃其音旣奏餘絃悉絕菩薩摩訶薩亦復如是以如來師子波羅蜜身菩提心筋爲法樂絃其音旣奏一切五欲及以二乘諸功德絃悉皆斷滅善男子譬如有人以牛羊等種種諸乳假使積集盈於大海以師子乳一滴投中直過無礙能令衆乳一時變壞菩薩摩訶薩亦復如是以如來師子菩提心乳著無始際業煩惱中直過無礙悉令壞滅終不住於二乘解脫善男子譬如雪山迦陵頻伽鳥在卵殼中有大勢力一切諸鳥所不能

及菩薩摩訶薩亦復如是於生死殼發菩提心所有
大悲功德勢力聲聞獨覺無能及者善男子如金翅
鳥王子初始生時目則明利飛則勁捷威勢力能超
過一切其餘衆鳥雖久成長無能及者菩薩摩訶薩
亦復如是發菩提心爲諸如來金翅王子智慧清淨
大悲勇猛具自在力神通威勢一切二乘雖百千劫
久修道行所不能及善男子如有壯夫手執利矛刺
堅密甲直過無礙菩薩摩訶薩亦復如是勇猛精進
執菩提心一切智智銛利快矛刺諸邪見隨眠密甲
悉能穿徹無有障礙善男子譬如摩訶那伽大力勇
士若奮威怒於其額上必生瘡洞瘡若未合閭浮提
中一切人衆無能制伏菩薩摩訶薩亦復如是若起
大悲必定發於菩提之心一切智瘡心未捨來一切
世間諸魔眷屬惑業惡人不能爲害善男子譬如射
師有諸弟子雖未慣習師之伎藝然其智慧方便善
巧餘一切人所不能及菩薩摩訶薩初始發心亦復
如是雖未慣習一切智行菩提事業然其所有願智
解欲一切世間凡夫二乘悉不能及善男子如人學
射先安其足後習其法及諸劍術一切武藝斯爲根
本菩薩摩訶薩亦復如是欲學如來一切智道先當

安住菩提之心然後修行一切佛法善男子譬如幻師將作幻事先當起意憶持幻法然後一切悉得成就菩薩摩訶薩亦復如是將起一切諸佛菩薩神通幻事先當發起大菩提心然後一切悉得成就善男子譬如幻術無色現色一切變化皆能顯示菩薩摩訶薩菩提心相一切智幻亦復如是雖無有色可觀見然能普於十方法界示現種種功德莊嚴善男子譬如猫狸纔見於鼠鼠卽入穴不敢復出菩薩摩訶薩發菩提心亦復如是暫以慧眼觀諸惑業皆卽竄滅不復出生善男子譬如有人著闇浮金莊嚴之具映蔽一切衆寶光明皆如聚墨菩薩摩訶薩亦復如是著菩提心一切智智金莊嚴具映蔽一切凡夫二乘功德莊嚴悉無光色善男子如好磁石少分之力卽能吸壞一切堅牢諸鐵鉤鎖菩薩摩訶薩亦復如是若起一念菩提之心悉能壞滅一切邪見貪欲繫縛無明鉤鎖善男子如有磁石隨所在處鐵若見之卽皆散滅無留住者菩薩摩訶薩亦復如是發菩提心以智觀察一切世間諸業煩惱二乘解脫若暫見之卽皆散滅無有住者善男子譬如漁人善入大海一切水族無能爲害假使入於摩竭魚口亦不爲

彼之所吞噬菩薩摩訶薩亦復如是發菩提心入生死海諸業煩惱一切水族不能爲害假使入於聲聞獨覺實際解脫摩竭口中亦不爲其之所留難善男子譬如有人飲甘露漿一切諸毒不能爲害菩薩摩訶薩亦復如是飲菩提心一切智智甘露法漿不墮聲聞辟支佛地以具廣大悲願力故善男子譬如有人得安縉那藥以塗其目雖能自在遊行人間一切世人所不能見菩薩摩訶薩亦復如是得菩提心安縉那藥能以願智方便隨順天魔境界自在遊行一切衆魔所不能見善男子譬如有人依附於王不畏餘人菩薩摩訶薩亦復如是依菩提心住一切智大勢力王不畏世間一切障蓋惡趣之難善男子譬如有人住於水中不畏火焚菩薩摩訶薩亦復如是住菩提心善根水中不畏一切聲聞獨覺解脫智火善男子譬如有人依倚猛將卽不怖畏一切怨敵菩薩摩訶薩亦復如是依菩提心勇猛智將不畏一切惡行怨敵善男子如釋天王執金剛杵摧伏一切阿脩羅衆菩薩摩訶薩亦復如是持菩提心金剛智杵摧伏一切諸魔外道阿脩羅衆善男子譬如有人得最勝藥服之延齡長得充健不羸不瘦不老不病菩薩

摩訶薩亦復如是服菩提心最勝智藥住無數劫生死之中修菩薩行心無疲厭亦無染著善男子譬如有人調和藥汁必當先取好清淨水於一切處平等受用菩薩摩訶薩亦復如是欲修菩薩一切行願先當發起菩提之心能令一切平等受潤善男子譬如有人欲護其身先護命根菩薩摩訶薩亦復如是護持一切諸佛正法應先守護菩提之心善男子譬如有人命根若斷所務皆息不能利益父母宗親菩薩摩訶薩亦復如是捨菩提心一切智命所有功德皆不成就不能利益一切衆生善男子譬如大海一切毒藥所不能壞菩薩摩訶薩亦復如是發菩提心一切智海諸業煩惱二乘之心一切衆毒所不能壞善男子譬如日輪星宿光明不能映蔽菩薩摩訶薩亦復如是菩提心日大智慧輪一切二乘無漏功德星宿智光所不能蔽善男子譬如王子初始生時卽爲一切耆舊大臣之所尊重以種族真正增上自在故菩薩摩訶薩亦復如是於佛法中初發菩提一切智心生如來家爲法王子卽爲一切久修梵行聲聞緣覺所共尊重以菩提心大悲種姓增上自在故善男子譬如王子年雖幼稚一切大臣皆悉敬禮然此王

子於彼大臣心雖敬重不應禮拜以種姓殊勝故苦
薩摩訶薩亦復如是雖初發心修菩薩行二乘耆舊
久修梵行見此菩薩皆應敬禮以得法殊勝故善男
子譬如王子雖於一切臣佐之中未得自在輔相大
臣無能與等以其生處極尊勝故菩薩摩訶薩亦復
如是雖於一切業煩惱中未得自在然其已發大菩
提心諸阿羅漢及辟支佛無能與等以具如來聖種
姓故善男子譬如清淨摩尼寶珠眼有翳故見爲不
淨菩薩摩訶薩亦復如是大菩提心本性清淨一切
衆生無智翳眼以不信故謂爲不淨善男子譬如有
藥爲呪所持若有衆生見聞同住一切諸病皆得消
滅菩薩摩訶薩菩提心藥亦復如是一切善根智慧
方便皆爲願智共所攝持若有衆生見聞同住隨順
憶念諸煩惱病悉得除滅善男子譬如有人常服甘
露其身畢竟不變不壞菩薩摩訶薩亦復如是若常
憶持菩提心露令願智身畢竟不壞善男子譬如有人
披鵝羽衣一切泥水不能染著菩薩摩訶薩亦復
如是淨菩提心白鵝羽衣一切生死諸業煩惱不能
染著善男子譬如桴筏以繩貫穿連綴竹木不令分
散於河流中遊行自在菩薩摩訶薩亦復如是以菩

提心大願智繩攝持諸行不令分散法駛流中遊行
自在隨順趣入一切智海善男子譬如木人若無機
關身卽離散雖具支分不能運動菩薩摩訶薩亦復
如是捨菩提心行卽分散不能成就一切佛法善男
子如轉輪王有沉香寶名曰象藏若燒此香王四種
兵悉騰虛空菩薩摩訶薩菩提心香亦復如是若發
此心卽令菩薩一切善根永出三界行如來智普遍
無盡虛空法界善男子譬如金剛唯從金剛及金處
生非餘寶處之所能生菩薩摩訶薩菩提心金剛亦
復如是唯從大悲救護衆生金剛處生及能觀察一
切智境金處而生非餘衆生善根處生善男子譬如
有樹名曰無根所依住處竟不可得而其一切枝葉
華果悉皆繁茂菩薩摩訶薩菩提心樹亦復如是一
切智性無有所依而能生長福德智慧神通大願枝
葉華果饒益世間普覆一切善男子如金剛寶非諸
劣惡及甃破器所能容持唯除金銀全具寶器菩薩
摩訶薩發菩提心金剛智寶亦復如是非餘下劣薄
福衆生慳嫉破戒瞋恨懶惰妄念無智諸惡器中所
能容持亦非退失殊勝志願散亂惡覺衆生器中所
能容持唯除菩薩深心寶器善男子譬如金剛能鑽

衆寶菩薩摩訶薩菩提心金剛亦復如是悉能穿徹
一切法寶善男子譬如金剛能壞一切堅固寶山菩
薩摩訶薩菩提心金剛亦復如是悉能摧壞諸邪見
山善男子譬如金剛雖破不全猶勝衆寶金莊嚴具
菩薩摩訶薩亦復如是發菩提心一切智寶雖復志
劣少有虧損猶勝一切二乘功德善男子譬如金剛
雖有損缺猶能除滅一切貧苦菩薩摩訶薩亦復如
是發菩提心一切智寶雖諸戒行多有損缺終能捨
離一切生死善男子譬如金剛乃至少分悉能破壞
一切諸物菩薩摩訶薩亦復如是發菩提心乃至一
念卽破一切無知識惑善男子譬如金剛非諸凡下
之所能得菩薩摩訶薩菩提心金剛一切智寶亦復
如是非諸劣意凡夫二乘之所能得善男子譬如金
剛不識寶人不知其能不得受用菩薩摩訶薩菩提
心金剛亦復如是鈍根無智下劣凡夫不了其能不
得其用善男子譬如金剛無能銷滅菩薩摩訶薩菩
提心金剛亦復如是一切諸法無能銷滅善男子如
金剛杵諸大力士皆不能持唯除有大那羅延力菩
薩摩訶薩菩提心杵亦復如是一切二乘雖有大力
皆不能持唯除菩薩廣大因緣堅固善力善男子譬

如金剛一切諸物無能壞者而能普壞一切諸物無有障礙然其體性亦不損減菩薩摩訶薩菩提之心亦復如是普於三世無數劫中敎化衆生修行苦行一切世間聲聞獨覺所不能者咸能作之然一切智大心金剛畢竟堅固無有損減不生疲厭亦無障礙善男子譬如金剛非餘地分之所能持唯除堅厚金剛之際菩薩摩訶薩菩提之心亦復如是聲聞獨覺所有行願皆不能持唯除趣向薩婆若道諸大菩薩堅固智力善男子如金剛器無有瑕隙用盛於水永不滲漏而無散失菩薩摩訶薩大菩提心金剛寶器亦復如是體性無漏堅固廻向盛善根水永不散失善男子如金剛輪能持大地不令散壞亦不陷沒菩薩摩訶薩菩提之心亦復如是能持菩薩一切行願不令墜沒入於三界善男子譬如金剛久處水中不爛不壞菩薩摩訶薩菩提之心亦復如是於一切劫久處生死業煩惱中不爛不壞善男子譬如金剛一切大火不能燒燄不能令熱菩薩摩訶薩菩提之心亦復如是一切生死諸煩惱火不能燒燄不能令熱善男子譬如此界一切諸佛將成正覺降伏四魔證一切智坐道場時唯三千界金剛地際金剛座上之

所能持非是餘座所能成就菩薩摩訶薩菩提心座
亦復如是能持菩薩一切行願諸波羅蜜圓滿諸忍
深入諸地具足善根種種迴向蒙佛授記修習增長
諸菩薩道親近供養一切如來承順受持大法雲雨
速疾增長堅固大悲及能成辦一切願智乃至究竟
阿耨多羅三藐三菩提唯金剛智之所能持非餘善
根所能成就善男子如轉輪王遊四天下七寶之中
輪寶先導菩薩摩訶薩亦復如是爲法輪王利益一
切菩提心寶最爲先導善男子譬如世間滅除怨敵
諸器仗中弓箭最勝菩薩摩訶薩亦復如是於諸一
切助道具中菩提之心最爲第一悉能滅除一切煩
惱生死怨故善男子譬如一切水生華中優鉢羅華
而爲最勝陸生華中瞻博迦華而爲最勝菩薩摩訶
薩菩提之心亦復如是一切智體優鉢羅華大慈悲
心瞻博迦華最爲第一能滅衆生業煩惱故善男子
如諸乘中船爲第一以行速疾令身安樂能達大海
到於彼岸菩薩摩訶薩亦復如是於彼一切二乘之
中大菩提心而爲第一以能速疾運度衆生令其安
樂達彼岸故善男子譬如世間一切水中雨水第一
菩薩摩訶薩亦復如是於諸一切三昧水中菩提之

心而爲第一能生一切禪定解脫甘露味故善男子譬如鹽中先陀婆鹽而爲第一能除諸病及能明眼菩薩摩訶薩亦復如是於其八萬四千法中菩提之心而爲最勝以能除滅一切衆生惑業重病生智明故善男子譬如乳中牛乳第一能除諸病令人增壽菩薩摩訶薩菩提之心亦復如是於諸正法甘露味中而爲最勝能除衆生諸煩惱病及令菩薩慧命增故善男子此菩提心成就如是無量無邊乃至不可說不可說具足圓滿殊勝功德若有衆生發阿耨多羅三藐三菩提心則獲如是具足圓滿勝功德法善男子汝獲善利具善名稱汝今能發阿耨多羅三藐三菩提心求菩薩行已得如是難行難集大功德故大方廣佛華嚴經卷第三十六

音釋

瘢

蒲官切
瘡痕也

積

正作積子智
切堆也聚也

卵殼

卵魯管切羽蟲所
生爲卵殼克角女

鳥卵

鰲之切石名可以引鍼

磁

凡山之陽產
鐵其陰必有磁石是二物同氣也

綴

切連

息資切瓦
器破聲也

斂

瓦吳江吳氏己亥五月二十七日生施貲刻此
華嚴經普賢行願品第三十六卷祈求修行得道
延年益壽者汝寧比丘如清對江寧張時化刻書美曆辛卯秋五臺山妙德庵識

大方廣佛華嚴經卷第三十七

唐罽賓國三藏般若奉詔譯

入不思議解脫境界普賢行願品之三十七
爾時彌勒菩薩告善財童子言善男子如汝所問菩
薩云何學菩薩行修菩薩道善男子汝可入此毗盧
遮那莊嚴藏大樓閣中周遍觀察則能了知一切菩
薩學菩薩行學已能行圓滿成就無量功德爾時善
財童子恭敬右遶彌勒菩薩摩訶薩已而白之言唯
願大聖開樓閣門令我得入時彌勒菩薩前詣毗盧
遮那莊嚴藏樓閣卽以右手彈指出聲其門卽開命

善財入善財心喜入已還閉見其樓閣廣博無量同
於虛空阿僧祇寶以爲其地阿僧祇宮殿阿僧祇門
闔阿僧祇牕牖阿僧祇階陞阿僧祇欄楯阿僧祇道
路皆七寶成阿僧祇旛阿僧祇幢阿僧祇恭周廻間
列阿僧祇衆寶瓔珞阿僧祇白真珠瓔珞阿僧祇赤
真珠瓔珞阿僧祇師子珠瓔珞處處垂下阿僧祇半
月阿僧祇滿月阿僧祇繒帶以爲嚴飾阿僧祇師子
幢網阿僧祇摩尼網阿僧祇妙金網阿僧祇金線網
間錯莊嚴羅覆其上阿僧祇寶鐸阿僧祇寶鈴風動
流音其聲可愛散阿僧祇天諸雜華懸阿僧祇天寶
蔓帶嚴阿僧祇衆寶香爐雨阿僧祇細妙金屑懸阿
僧祇寶鏡熒阿僧祇寶閣浮檀金童女像阿僧祇寶衣列阿僧祇
寶帳持阿僧祇寶竿設阿僧祇寶座阿僧祇寶繒以
敷座上阿僧祇寶像處處充徧威德莊嚴阿僧
祇像阿僧祇妙寶菩薩像處處充徧威德莊嚴阿僧
祇衆鳥出和雅音令人愛樂阿僧祇寶優鉢羅華阿
僧祇寶波頭摩華阿僧祇寶拘物頭華阿僧祇寶芬
陀利華以爲莊嚴阿僧祇寶樹次第行列阿僧祇寶
芭蕉樹微妙莊嚴阿僧祇寶經行路金繩界道阿僧
祇寶池香水盈滿阿僧祇寶橋飛梁雲構阿僧祇寶

地妙砌交映阿僧祇摩尼寶放大光明阿僧祇衆妙音聲讚大功德有如是等無量阿僧祇諸莊嚴具以爲莊嚴善財又見樓閣之中具有無量百千樓閣一樓閣種種莊嚴悉如上說廣博嚴麗皆同虛空顯現分明猶如形影互相映徹無有障礙不相雜亂善財童子於一處中見一切處一切諸處亦如是見如是一切盡無有餘一一物中見皆如是爾時善財童子見毗盧遮那莊嚴藏樓閣之中如是種種不可思議自在境界生大愛敬踊躍無量身心柔軟歡喜潤澤離一切想除一切障滅一切惑所見不忘所聞能憶所思不亂入於無礙解脫法門以無礙意普運其心一切供養以無礙眼普見一切微細境界以無礙身徧於一切恭敬作禮以彌勒菩薩威神力故自見其身徧在一切諸樓閣中具見種種不可思議自在境界所謂或見彌勒菩薩初發無上菩提心時如是名字如是種族如是善友之所開悟令其種植如是善根住如是壽在如是劫值如是佛處於如是莊嚴刹土修如是行發如是願彼諸如來如是衆會如是壽量經爾許時親近供養悉皆明見或見彌勒最初證得慈心三昧從是已來號爲慈氏或見彌勒修習

一切難行妙行成滿一切諸波羅蜜或見得忍或見
住地或見莊嚴種種佛刹或見受持一切佛教爲大
法師得無生忍或見在於某時某處某如來所受於
無上菩提之記或時見作轉輪聖王普令衆生住十
善道或爲護世利樂衆生或爲釋天呵責五欲或爲
夜摩天王爲彼諸天讚不放逸或爲兜率天王稱歎
菩薩補處功德或爲化樂天王爲現菩薩變化莊嚴
或爲他化自在天王爲說諸佛自在之法或作魔王
說一切法皆悉無常或爲梵王說諸禪定無量喜樂
或爲阿脩羅王爲其衆會說斷一切憍慢醉傲入大
智海了法如幻或復見處閻魔羅界放大光明救地
獄苦或見在於餓鬼之處施諸飲食濟彼饑渴或見
在於畜生之道種種方便調伏衆生或復見爲護世
天王衆會說法或復見爲忉利天王衆會說法或復
見爲夜摩天王衆會說法或復見爲兜率天王衆會
說法或復見爲化樂天王衆會說法或復見爲他化
自在天王衆會說法或復見爲一切魔王衆會說法
或復見爲乾闥婆緊那羅王衆會說法或復見爲阿脩羅陀
爲乾闥婆緊那羅王衆會說法或復見爲阿脩羅陀

那婆王衆會說法或復見爲迦樓羅摩睺羅伽王衆
會說法或復見爲其餘一切人非人等衆會說法或
復見爲一切聲聞衆會說法或復見爲一切獨覺衆
會說法或復見爲初發心菩薩而演說法或復見爲
修行廻向乃至得忍住不退轉諸菩薩衆而演說法
或復見爲一生所繫已受灌頂諸菩薩衆而演說法
或見讚說菩薩初地乃至十地所有一切最勝功德
或見讚說滿足一切諸波羅蜜或見讚說入諸忍門
或見讚說諸大三昧門或見讚說甚深解脫門或見
讚說諸禪三昧神通境界或見讚說諸菩薩行方便
善巧或見讚說種種出生諸大誓願或見與諸同行
菩薩讚說世間資生工巧於一切處談議種種最勝
方便調伏成熟一切衆生或見彌勒與諸一生補處
菩薩讚說一切佛灌頂門或見彌勒修行精進於百
千年身心無倦或見彌勒經行讀誦書寫經卷未嘗
休息或見彌勒種種方便爲衆說法或見彌勒入諸
禪定四無量心或入徧處及諸解脫或入三昧以方
便力現諸神變或見一切諸菩薩衆皆入種種變化
三昧各於其身一一毛孔出於一切變化身雲或見
出現天衆身雲或見出現龍衆身雲或見出現夜叉

羅刹乾闥婆阿脩羅迦樓羅緊那羅摩睺羅伽釋梵
護世轉輪聖王身雲或見出現小王王子大臣官屬
長者居士身雲或見出現聲聞獨覺菩薩身雲或見
出現一切如來威德身雲或見出現一切衆生變化
身雲或見出現一切妙音讚諸菩薩種種法門所謂
或見讚說發菩提心功德門或見讚說施波羅蜜淨
戒安忍精進定慧方便願力智波羅蜜功德門或見
讚說諸攝諸禪諸無量心及諸三昧三摩鉢底諸通
諸明總持辯才諸諦諸智止觀解脫諸緣諸依功德
門或見讚說念處正勤神足根力七菩提分八聖道
分諸聲聞乘諸獨覺乘諸菩薩乘諸地諸忍諸行諸
願如是一切諸功德門或復於中見諸如來種種集
會大衆圍遶又亦見彼一切如來生處種姓身形壽
命刹劫名號道場衆會說法利益教住久近種種不
同悉皆明見爾時善財童子又復於彼毗盧遮那莊
嚴藏內諸樓閣中見一樓閣高廣殊麗總攝諸閣一
切莊嚴勝妙於前最上無比於中悉見三千大千世
界百億四天下百億閣浮提百億堯率陀天一一皆
有彌勒菩薩蓮華藏中降神誕生釋梵天王捧持頂
戴遊行七步觀察十方大師子吼現爲童子居處宮

殿遊戲園苑爲一切智踰城出家現諸苦行示受乳
糜往詣道場降伏諸魔成等正覺觀菩提樹梵王勸
請轉正法輪昇天宮殿而演說法劫數壽量衆會莊
嚴所淨佛刹所修行願所現威德所起方便教化成
熟一切衆生分布舍利住持遺教皆悉不同爾時善
財自見其身在彼一切諸如來所承事供養亦見於
彼一切衆會大道場中所有佛事憶持不忘加持力
故通達無礙精進勤求安住智地復聞一切諸樓閣
內寶網鈴鐸及諸樂器皆悉演暢不可思議微妙法
音說種種法所謂或說菩薩發菩提心或說修行波
羅蜜行或說諸願或說諸地或說神通心自在行或
說恭敬供養如來或說莊嚴諸佛刹土或說諸佛說
法差別如上所說一切佛法悉聞其音敷暢辯了又
聞某處某世界中有某菩薩聞某法門其善知識之所
勸導發菩提心令修妙行於某劫某刹某如來所
某衆會中聞某如來如是功德發如是心起如是願
種於如是廣大善根經若干劫修菩薩行於爾許時
當得成佛如是名號如是壽量如是國土一切功德
具足莊嚴滿如是願能以如是最勝方便教化調伏
如是衆生如是聲聞菩薩衆會佛涅槃後正法住世

經爾許劫利益如是無量衆生或聞某處某世界中
有某菩薩廣修布施波羅蜜行難捨能捨如是淨戒
忍辱精進禪定智慧修習如是諸波羅蜜或聞某處
某世界中有某菩薩爲求法故棄捨王位及諸珍寶
妻子眷屬頭目手足一切身分皆無所恠或聞某處
某世界中有某菩薩守護如來所說正法爲大法師
廣行法施高建法幢吹大法螺擊大法鼓雨大法雨
造佛塔廟作佛形像種種莊嚴一一殊麗施諸衆生
一切樂具或聞某處某世界中有某如來於某劫中
成正等覺如是國土如是衆會如是壽量說如是法
滿如是願教化如是無量衆生現前覺悟無上菩提
善財童子聞如是等不可思議微妙法音身心歡喜
柔軟悅澤卽得無量諸總持門卽得無量諸辯才門
諸禪諸忍諸大行願諸波羅蜜諸通諸明及諸解脫
諸三昧門又見一切諸寶鏡中出生無量種種形像
所謂或見諸佛衆會道場或見菩薩衆會道場或見
聲聞衆會道場或見獨覺衆會道場或見清淨世界
或見不淨世界或見淨不淨世界或見不淨淨世界
或見有佛世界或見大世界或見無佛世界或見小世界或見中
世界或見廣大世界或

見因陀羅網世界或見覆世界或見仰世界或見側
世界或見平坦世界或見地獄畜生餓鬼所住世界
或見天人充滿世界於如是等諸世界中見有無數
大菩薩衆或行或坐作諸事業或見修禪或習智慧
或起大悲憐愍衆生或造諸論利益世間或教弟子
或自受持或書或誦或問或答三時懺悔迴向發願
又見一切諸寶柱中放摩尼王大光明網或青或黃
或赤或白或玻璃色或水精色或帝青色或虹蜺色
或闇浮檀妙真金色或作一切諸光明色又復見彼
闇浮檀金諸童女像及衆寶像或執華雲或執衣雲
或執幢旛或執鬘蓋或持種種塗香末香或持上妙
摩尼寶網或垂金鎖或挂瓔珞或舉其臂捧莊嚴具
或低其首垂摩尼冠曲躬瞻仰目不暫捨合掌而住
又見於彼真珠瓔珞常出香水具八功德流注無窮
瑠璃瓔珞百千光明同時照耀幢旛網蓋如是等物
一切皆以摩尼王藏衆寶莊嚴令人樂見又復見彼
種種華池優鉢羅華波頭摩華拘物頭華芬陀利華
各各生於無量諸華或大一手或長一肘或復縱廣
量如車輪一一華中皆悉示現種種色像以爲嚴飾
所謂男色像女色像童男色像童女色像釋梵護世

天龍夜叉乾闥婆阿脩羅迦樓羅緊那羅摩睺羅伽
聲聞獨覺及諸菩薩如是一切衆妙色像皆悉合掌
曲躬禮敬亦見如來結跏趺坐三十二相莊嚴其身
又復見彼淨瑠璃地一步一步間現不思議種種色像
所謂世界色像菩薩色像如來色像及諸樓閣莊嚴
色像又於寶樹枝葉華果一一事中悉見種種半身
色像所謂佛半身色像菩薩半身色像天龍夜叉乾
闥婆阿脩羅迦樓羅緊那羅摩睺羅伽釋梵護世轉
輪聖王小王王子大臣官長長者居士童男童女及
以四衆半身色像其諸色像或執華鬘或執瓔珞或
執一切諸莊嚴具或有曲躬合掌禮敬一心瞻仰目
不暫捨或有讚歎或入三昧其身悉以相好莊嚴普
放種種諸色光明所謂金色光明銀色光明珊瑚色
光明兜沙羅金色光明帝青色光明毗盧遮那摩尼
王寶色光明一切衆寶色光明瞻葡萄華光明從於
自身三十二相出如是等一切光明又見於彼一切
樓閣半月像中出阿僧祇日月星宿種種光明普照
十方又見一切諸妙樓閣種種宮殿衆寶垣牆周廻
四壁種種寶色一一步內一切衆寶以爲莊嚴一一
寶中皆現彌勒襄劫修行菩薩道時或施頭目或施

手足脣舌牙齒耳鼻血肉皮膚骨髓乃至爪髮如是
一切悉皆能捨妻妾男女奴婢僕使妓侍婢女一切
眷屬城邑聚落宮殿園林或閭浮提或四天下種種
富樂尊貴自在大小王位或諸資具隨時飲食上妙
牀敷憩息之處或妙寶器或駟馬車隨其所須盡皆
施與處牢獄中種種困厄令得出離身被繫縛臨刑
戮者使其解脫諸有病疾所縈纏者爲其救療惠以
醫藥令得除差入邪徑者示其正道或爲船師令度
大海使諸衆生不失津濟或爲馬王救諸衆生令離
一切羅刹惡難或爲種種大智仙人善說諸論利益
衆生或爲輪王勸修十善或爲醫王善療衆病或孝
順父母恭敬供養或親近善友隨順聽聞或作聲聞
或作獨覺或作菩薩或作如來教化調伏一切衆生
或示種種最勝生處成熟生處所有衆生或爲法師
奉行如來所有言教種種威儀受持讀誦微細觀察
如理思惟立佛支提作佛形像一一珍飾種種莊嚴
若自供養若勸於他塗香散華燈油鬘蓋種種敷設
恭敬禮拜如是等事相續不絕或見坐於師子之座
廣演說法勸諸衆生安住十善一心歸向佛法僧寶
受持五戒及八齋戒出家聽法受持讀誦正念作意

如理修行乃至見於彌勒菩薩坐師子座講宣法要
開示一切諸佛菩提又見彌勒經百千億那由他阿
僧祇劫修行諸度一切色像又見彌勒曾所承事諸
善知識悉以一切功德莊嚴亦見自身在彼一一善
知識所親近供養受行其教乃至住於灌頂之地時
諸知識咸以輒語告善財言善來童子汝今觀此菩
薩所有不思議事莫生疲厭爾時善財童子得不忘
失正念力故得見十方清淨眼故得善觀察無礙智
故得諸菩薩自在智故得諸菩薩已入智地廣大解
故於諸樓閣一一物中悉見如是及餘無量不可思
議自在境界諸莊嚴事譬如有人於睡夢中見種種
物所謂一切城邑聚落宮殿園苑山林河池衣服飲
食乃至一切資生之具或見一切可愛歌讚鼓樂集
會種種遊戲或見自身父母兄弟内外親屬或見大
海須彌山王乃至一切諸天宮殿閣浮提等四天下
事或見其身形量廣大百千由旬房舍衣服種種功
德一切莊嚴悉皆相稱謂於晝日經無量時不眠不
寢受諸安樂悉皆具足一切自在從睡覺已乃知是
夢遠離一切安樂等想亦無時節長短之相而能明
記所見之事一切隨順曾無忘失善財童子亦復如

是以彌勒菩薩威神之力所加持故知三界法皆如夢故滅諸衆生狹劣想故得無障礙廣大解故徃諸菩薩殊勝界故入不思議方便智故能見如是諸大菩薩一切莊嚴自在境界隨順解知微細觀察譬如有人將欲命終見隨其業所受報相行惡業者見於地獄畜生餓鬼所有一切衆苦境界或見獄卒手持兵仗或瞋或罵囚執將去亦聞地獄一切衆生所有號叫悲歎之聲或見灰河或見鑊湯或見刀山或見劍樹或見猛火炎熾洞然或見揚波沸水騰注種種逼迫受諸苦惱行善業者卽見一切諸天宮殿無量天衆天諸姝女種種衣服具足莊嚴宮殿園林華池河水及諸寶山寶劫波樹隨意受用盡皆妙好身雖未死而由業力見如是事善財童子亦復如是以菩薩業不思議力得見一切莊嚴境界譬如有人爲鬼所持見種種事色相眷屬隨其所問悉皆能答善財童子亦復如是菩薩智慧之所持故見彼一切諸莊嚴事若有問者靡不能答譬如有人爲龍所持自謂是龍入於龍宮見龍眷屬於少時間自謂已經日月年載善財童子亦復如是以住菩薩智慧想故彌勒菩薩自在威力所加持故於少時間謂經無量百千

萬億那由他劫譬如梵宮名一切衆生勝莊嚴藏於中悉見三千大千世界所有諸物差別影像不相雜亂善財童子亦復如是於樓閣觀中普見一切莊嚴境界種種差別互相涉入各各差別不相雜亂譬如比丘入遍處定若行若住若坐若臥隨所入定境界現前善財童子亦復如是入於樓觀一切莊嚴所見境界甚深隨順悉皆明了譬如有人於虛空中見乾闢婆城具足莊嚴悉分別知無有障礙善財童子亦復如是見彼一切莊嚴境界甚深隨順明了無礙譬如夜叉宮殿與人宮殿同在一處而不相雜亦無障礙各隨其業所見不同譬如大海於中印現三千世界所有色像譬如幻師善明幻法以幻力故現諸幻事種種作業一切能成善財童子亦復如是以彌勒菩薩威神力故及不可思議幻智力故得諸菩薩自在力故見樓閣中一切莊嚴自在境界

大方廣佛華嚴經卷第三十七

音釋

阿僧祇梵語也亦云僧祇耶此云無央數階陞階古諧切陞傍禮切階陞謂升堂之階級欄楯欄卽干切勾欄也楯也指堅尹也切闕檻也縱曰檻橫曰楯繒帶也謂帛也也

兵江陸氏廣臨施費刻此
華嚴經普賢行願品第三十七卷祈求修行得道
延年益壽汝寧比丘如清對
江寧石仲松刻
萬曆辛卯秋五臺山妙德庵識

大方廣佛華嚴經卷第三十八

唐罽賓國三藏般若奉詔譯

入不思議解脫境界普賢行願品之三十八

爾時彌勒菩薩摩訶薩入樓閣中攝其神力彈指出聲告善財言善男子起法性如是此是菩薩知諸法智因緣聚集顯現之相如是自性悉不成就如幻如夢如影如像爾時善財聞彈指聲從三昧起彌勒告言善男子汝見菩薩自在解脫威神力不汝見菩薩一切助道等流力不汝見菩薩願智所現聚集力不汝見菩薩種種莊嚴妙宮殿不汝見菩薩種種行力

所聚集不汝見菩薩種種功德莊嚴刹不汝見菩薩十地之中種種力不汝見菩薩諸波羅蜜難思果不汝見菩薩種種難思三昧力不汝見如來種種最勝大願力不汝聞菩薩種種出生解脫門不汝隨順解菩薩解脫不思議不汝隨順受菩薩三昧能喜樂不善財白言唯然已見是善知識加持力故憶念力故威德力故聖者此解脫門其名何等彌勒告言此解脫門名入三世一切境界不忘念智莊嚴藏善男子一生菩薩得如是等不可說不可說解脫門善財白言聖者此莊嚴事何處去耶彌勒告言於來處去曰從何處來曰從諸菩薩智慧威力中來依諸菩薩智慧威力而住無有少分去來之處無集無增無成無立不依於地不依於空遠離一切善男子譬如龍王種種雲雨不從身出不從心出無有積集建立增長但以龍王心念力故需然洪霆周遍天下此是龍王難思境界善男子彼莊嚴事亦復如是不住於內亦不住外但由菩薩威德自在汝善根力而非不見善男子譬如幻師作諸幻事無所從來亦無所去無行無入無隱無顯而以幻力分明顯現彼莊嚴事亦復如是無所從來亦無所去無集無成然以慣習不可

思議幻智力故及由過去大願力故如是顯現善財童子白言大聖從何處來彌勒告言善男子一切菩薩無來無去如是而來無行無住如是而來無處無定不沒不生不住不遷不動不起無戀無著無業無報無起無滅不斷不常如是而來復次善男子菩薩從大悲處來愍念調伏諸衆生故從大慈處來救護逼迫苦衆生故從淨戒處來隨其所樂自在生故從大願處來往昔願力所加持故從神通處來於一切處隨樂現故從無動搖處來不捨如來不動體故從無取捨處來不役身心使往來故從智慧方便處來隨順一切衆生轉故從示現變化處來猶如影像而化現故復次善男子汝向所問何處來者善男子我從生處摩羅提國房舍聚落而來於此彼有長者名瞿波洛迦爲化其人令入佛法又爲生處一切人衆隨其根器而爲說法亦爲父母親戚眷屬婆羅門等演說大乘令其趣入故住於彼而從彼來善財言聖者何者是菩薩生處彌勒答言善男子菩薩有十種生處何等爲十所謂發菩提心是菩薩生處生菩薩家故深心是菩薩生處生善知識家故諸地是菩薩生處生波羅蜜家故大願是菩薩生處生妙行家故

大悲是菩薩生處生四攝家故如理觀察是菩薩生處生般若波羅蜜家故大乘是菩薩生處生方便善巧家故成熟衆生是菩薩生處生成等正覺家故智慧方便是菩薩生處生無生法忍家故修行諸法是菩薩生處生三世一切如來家故善男子是爲菩薩十種受生處復次善男子菩薩摩訶薩以般若波羅蜜爲母方便善巧爲父檀那波羅蜜爲乳母尸羅波羅蜜爲養母忍辱波羅蜜爲莊嚴具精進波羅蜜爲養育者禪那波羅蜜爲浣濯人善知識爲教授師一切菩提分爲伴侶一切善法爲親屬一切菩薩爲兄弟菩提心爲家如理修行爲家法諸地善法爲家處得諸忍法爲家族大願現前爲家教以清淨智滿足諸行爲順家法勸發勤修不斷大乘爲紹家業法水灌頂一生所繫菩薩爲王太子成就廣大真實菩提爲淨家族善男子菩薩如是超凡夫地入菩薩位生如來家住佛種性能修諸行不斷三寶善能守護菩薩種族淨菩薩種生處尊勝於諸世間離生過惡一切天人及諸魔梵沙門婆羅門中種族具足而得成就最勝佛種得大願藏普能出生諸菩薩行善男子菩薩摩訶薩成就如是尊勝家已智了諸法如影像

故於世生處無所惡賤知一切法如變化故於諸有趣無所染著覺悟諸法無有我故調伏衆生心無疲訥以大慈悲爲體性故不趣寂滅攝受衆生了達生死猶如夢故經一切劫而無熱惱了知五蘊皆如幻故現處生死而無疲倦知諸界處卽法界故於諸境界無有瘡疣知一切想如陽焰故入於諸趣不生倒惑達一切法皆如幻故入魔境界自在無染成就法身淨妙體故一切煩惱不能欺誑成就一切遍趣行故於諸生處而得自在善男子我身普生一切法界等一切衆生差別色相等一切衆生殊異言音等一切衆生種種名號等一切衆生種種樂欲等一切衆生種種威儀隨順世間教化調伏等能顯示一切衆生清淨受生等隨順入一切衆生甚深勝解等一切菩薩大願變化於如是等無量品類而現其身種種相貌種種威德充滿法界善男子我爲成熟與我往昔同修諸行今時退失苦提心者示現生此閻浮提中爲欲調伏父母親屬及婆羅門令其離於種族驕慢得生如來種性中故生摩羅提國房舍聚落婆羅門家善男子我於南方及住於此毗盧遮那莊嚴藏大樓閣中隨諸衆生心之所樂種種方便教化調伏

善男子我爲隨順諸衆生故爲欲成熟兜率天中同
行天故爲欲示現菩薩福智莊嚴變化超過一切諸
欲界故令捨渴愛諸欲樂故令照諸行皆無常故令
知諸天盛必衰故爲欲示現降生瑞相與一生菩薩
而共宣說大智法門故爲欲攝受一切生處諸衆生
故爲欲教化釋迦如來所遣來者令如蓮華悉開悟
故而於此沒生兜率天善男子我願滿足得菩提時
汝及文殊俱來見我善男子汝當往詣文殊師利大
菩薩所而問之言菩薩云何學菩薩行云何深入普
賢行門云何出生云何成熟云何廣大云何清淨云
何隨順云何圓滿善男子彼當爲汝分別顯示何以
故善男子文殊師利最勝大願非餘無量百千億那
由他菩薩之所能有善男子文殊師利其行廣大無
量無邊其願無際相續不斷常能出生一切菩薩最
勝功德文殊師利菩薩常爲無量百千億那由他諸
佛母令其證入甚深理故常爲無量百千億那由他
菩薩師令其勤修深證入故普於十方常轉法輪教
化成熟一切衆生常於十方一切世界爲說法師常
爲不可說不可說一切諸佛大衆會中之所讚歎住
甚深智見法實性從久遠來深入一切解脫境界究

竟普賢所行諸行善男子文殊師利善知識能令汝得生如來家能增長汝諸善根能發起汝助道法能顯示汝真實善知識能勸發汝修習諸功德能令汝深入大願網能令汝安住大願門能令汝聞菩薩深密義能顯示汝菩薩難思行與汝往昔同生同行是故善男子汝當往詣文殊師利菩薩所莫生疲倦文殊師利當令汝得一切功德何以故汝先所見諸善知識聞諸菩薩行深入解脫門滿足大願海皆是文殊威神之力文殊師利於一切處咸得究竟時善財童子右遶彌勒經無量布頂禮雙足懸勸瞻仰心懷戀慕辭退而去爾時善財童子經遊一百一十城已詣蘇摩那城住立門所思惟文殊師利隨順憶念普遍觀察希欲奉覲爾時文殊師利童子從一百一十由旬外遙申右手至蘇摩那城摩善財頂作如是言善哉善哉善男子若離信根心生疲厭心志下劣功行不具退失精勤於少善根而生知足不善發起一切行願不能親近諸善知識由如是故不能了知如是法性如是理趣如是法門如是境界如是住處若普遍知若少分知若甚深知若盡源底若觀察若證入若獲得皆悉不能是時文殊師利宣說此法示教

利喜令善財童子具足圓滿無數法門具足無邊大智光明深入種種念佛門無邊際陀羅尼門無邊際辯才門無邊際三昧門無邊際神通門無邊際願智門深入普賢諸行願輪稱歎文殊師利本住國土一切善巧時善財童子白文殊師利菩薩言聖者云何而得成就聖者國土善巧文殊師利告善財言善男子菩薩有十種法具足圓滿得我國土善巧成就善財白言何等爲十文殊師利菩薩言善男子一者證無生法具足圓滿二者無滅法三者不失壞法四者無來去法五者超言詞境界法六者無有言詞道法七者無戲論法八者不可說法九者寂靜法十者聖者法若諸菩薩於此十法具足圓滿得我國土善巧成就善財童子白言聖者所言國土是何義耶文殊師利言是一切菩薩住處義善財言云何是一切菩薩住處文殊師利言善男子最勝第一義是菩薩住處何以故善男子最勝第一義不生不滅不失不壞不來不去如此語言旣非言境言說不及不能記別非是戲論思度所知本無言說體性寂靜惟諸聖者自內所證善男子因此最勝第一義故諸佛如來出現世間若佛出世及不出世不可失壞善男子一切

菩薩爲欲證入第一義故捨大豪富年少王位難行能行種種苦行剃除鬚髮被服法衣正信出家專求妙道精勤匪懈如救頭然善男子若無第一義者所修梵行爲何所用如來出世爲何所依善男子以深信有第一義故令諸菩薩具足圓滿此十種法是故應當如是知見如是解說於我國土善巧成就善財童子白言聖者行何等法當得聖者淨妙國土文殊師利言若諸菩薩能於一切心無憍慢於諸衆生生平等心於諸如來修真供養得我國土善財童子白言聖者云何名爲無憍慢心生平等心修真供養文殊師利言善男子菩薩有十種法審諦思惟具足圓滿則能成就無憍慢心何等爲十一者一心思惟諦觀身界作是念言我今出家無殊死人所以者何父母親愛朋友眷屬一切所有皆棄捨故如是思惟得無憍慢二者思惟我今此身服壞色衣進止威儀不同世間如是思惟得無憍慢三者思惟旣毀形好執持應器乞匂於他如是思惟得無憍慢四者思惟我今乞食如旃陀羅如是思惟令心卑下得無憍慢五者思惟爲求段食長養我身我之壽命死在他手如是思惟得無憍慢六者思惟所乞之食人畜之餘彼

若嫌棄我方得食如是思惟得無憍慢七者思惟我今應當於師長所恭敬供養令生歡喜如是思惟得無憍慢八者思惟我今欲令同梵行者生歡喜故具足威儀無違法式如是思惟得無憍慢九者思惟我今出家於佛法中未得少分如是思惟得無憍慢十者思惟一切衆生於我嗔恨我常安忍如是思惟得無憍慢善男子是爲菩薩思惟十法具足圓滿則能成就無憍慢心復次善男子菩薩有十種法具足圓滿則於衆生得平等心何等爲十一者於諸衆生所作平等二者於諸衆生心無障礙三者於諸衆生心無疲倦四者爲欲利益諸衆生故具足修行六波羅蜜五者爲諸衆生集一切智亦不依止無二之相六者普觀衆生同於如如無所分別七者了達衆生體性平等而能證入平等心性八者願與衆生同得出離生死大火九者自旣出已復能拔出一切衆生十者平等安置一切衆生無憂惱處善男子譬如世間長者居士生育五子平等愛念受用資具等無有二而彼諸子愚小無知於一切處未能分別時彼長者宅舍之中欻然火起彼諸子等各居一處善男子於意云何時彼長者出諸子心有先後不善財答言彼

長者心等無先後隨所親近卽先濟拔文殊師利言
善男子菩薩摩訶薩亦復如是一切衆生在於生死
舍宅之中三毒熾火忽然而起其心愚暗無所分別
各隨業力五趣受生菩薩等心調伏成熟但隨親近
卽先拔濟成熟安置寂靜界中善男子是爲菩薩有
十種法具足圓滿於諸衆生成就平等復次善男子
菩薩有十種法具足圓滿則得成就修真供養一切
如來何等爲十一者以法供養二者修行諸行三者
平等利樂一切衆生四者以慈悲心隨順攝取五者
以如來力隨順一切六者不捨勤修一切善法七者
不捨一切菩薩事業八者如說能行如行能說九者
長時遍修心無疲厭十者常不捨離大菩提心若諸
菩薩具此十法則能成就供養如來非以財寶飲食
衣服名眞供養何以故如來恭敬尊重法故猶如孝
子尊重父母承順顏色心無暫捨若復有人敬其父
母其子倍復尊重是人諸佛如來亦復如是若諸衆
生供養法者是真成就供養如來以諸如來尊重法
故善男子如來從修行中來若能修行是則成就供
養如來諸佛出世本爲利樂諸衆生故爲以慈悲攝
衆生故隨順利樂而爲力故善男子若不勤修一切

善法亦不利樂一切衆生若捨菩薩所修事業是亦不能利樂衆生若復不能如說修行如行能說是亦不能利樂衆生若心下劣而生疲厭是亦不能利樂衆生若暫捨離菩提心者是亦不能利樂衆生何以故善男子夫爲菩薩爲欲利樂諸衆生故勤求阿耨多羅三藐三菩提若無衆生一切菩薩不成正覺善男子汝應如是解法供養則得成就供養如來非以世間財寶飲食名爲供養善男子是爲菩薩具足十法則能成就供養如來爾時文殊師利顯示如是無量無邊微妙法義勸教善財令修習已還攝神力忽然不現爾時善財童子卽見三千大千世界極微塵數諸善知識悉皆親近承事供養今生歡喜於所誘誨隨順受行增長趣求一切智意於佛境界生決定解大悲心海容納出生大慈教雲普覆一切於毗盧遮那廣大身雲增長愛敬於諸菩薩無礙解脫心常安住速疾出生如來普門無著淨眼觀一切佛修行圓滿功德大海深信如來積行所修一切智體精勤速疾增一切智助道之法善能廻向一切菩薩清淨深心善知三世一切如來相續不斷深入一切佛法教誨隨順解了諸佛法輪於諸世間如影普現深入

一切菩薩願海盡一切劫修菩薩行得普門智照如
來境增長一切菩薩諸根得一切智清淨光明普照
十方一切法界於一切刹教化衆生發修行心成就
利益能隨順解生死種類摧煩惱業一切障山隨順
證悟無障礙法入法界藏平等地中常住寂靜菩薩
解脫勤求一切如來境界一切諸佛威力加持善財
童子起如是等微細觀察安住普賢甚深境界卽聞
普賢菩薩名號及普賢行最勝大願從初發心最勝
助道最勝現前出生功德微細威儀及聞普賢菩薩
諸地及地處所地差別得地自在行地差別住地勇
猛地威德地同住旣聞此已渴仰欲見普賢菩薩卽
於金剛海藏菩提道場如來師子座前一切寶蓮華
藏座上起等虛空界廣大心拔一切現前執著心集
一切德無染心淨一切刹無想心了一切法歡喜心
觀一切境無礙心入一切方周遍心行一切行無障
心淨一切智境界妙行自在心觀一切菩薩道場莊
嚴清淨明了心深入一切如來法海廣大心調伏成
就一切衆生周遍心淨一切佛刹無量心了一切衆
會如影心住一切劫無盡心究竟如來力無所畏不
共佛法無退轉心善財童子起如是心以自善根所

潤澤故一切如來加被力故普賢同分善根力故欲見普賢有十種瑞相何等爲十一者見一切佛刹清淨一切如來道場莊嚴二者見一切佛刹清淨無諸惡道一切雜類三者見一切佛刹清淨衆妙蓮華以爲莊嚴四者見一切佛刹清淨一切衆生身心清淨五者見一切佛刹清淨衆寶爲體形色莊嚴六者見一切佛刹清淨一切衆生種種形色相好嚴身七者見一切佛刹清淨諸莊嚴雲普覆其上八者見一切佛刹清淨一切衆生互起慈心遞相利益九者見一切佛刹清淨菩提道場形體莊嚴十者見一切佛刹清淨一切衆生心常隨順憶念諸佛是爲十又見十種大光明相何等爲十一者見一切世界所有極微一一塵中出一切世界極微塵數如來光網雲周遍照耀二者見一一塵中出一切世界極微塵數如來圓光輪雲無量無數種種色相周遍法界三者見一一塵中出一切世界極微塵數種種如來寶影像雲周遍法界四者見一一塵中出一切世界極微塵數一切世界極微塵數種種妙香塗香燒香華鬘等雲周遍十方一切法界出大音聲稱讚普賢一切行願

大功德海六者見一一塵中出一切世界極微塵數種種日月星宿光明雲皆放普賢菩薩光明遍滿法界七者見一一塵中出一切世界極微塵數種種衆生形像燈雲猶如佛光遍照法界八者見一一塵中出一切世界極微塵數種種如來身影像摩尼寶雲周遍法界九者見一一塵中出一切世界極微塵數種種如來影像光明身雲如大雲雨普說一切如來大願及威德力十者見一一塵中出一切世界極微塵數種種菩薩圓滿光明影像身雲隨諸衆生種種變化普令一切皆生愛樂如是所作周遍法界是爲十爾時善財童子見此十種光明相已卽作是念我今必見普賢菩薩於時善財住自善根普光照力住諸如來所護念力能生佛法普智光明於普賢行現前照了於普賢願深入無際於一切如來境界深心信解於諸菩薩廣大境界得決定力修習得見普賢之相深入如來一切種智普攝諸根令其寂靜起大精進無有退轉身心普現十方世界卽以普眼觀察十方一切諸佛菩薩衆會諸莊嚴具一切境界皆作得見普賢之相以智慧眼觀察普賢從初發心所行之道其心廣大猶如虛空大悲堅固猶若金剛威德

加持盡未來際願不捨離普賢菩薩以平等心行普
賢行念念隨順清淨自在常得安住如來境界成就
普賢種種智地善財童子具足圓滿如是觀已卽見
普賢菩薩在於毗盧遮那如來應正等覺前坐蓮華
藏師子之座諸菩薩衆所共圍遶身相殊特世無與
等智慧功德種種境界不可思議一切菩薩微細觀察
無有邊際與諸如來平等無二善財童子見普賢
身一一毛孔念念中出一切世界極微塵數種種光
明雲遍法界虛空界一切世界普光照耀除滅一切
衆生苦患見一一毛孔念念中出一切佛刹極微塵
數種種色圓光雲令一切菩薩速疾增長廣大歡喜
見普賢菩薩頂及兩肩一一毛孔念念中出一切佛
刹極微塵數種種色香焰雲遍法界虛空界一切諸
佛衆會道場雨大香雨而以普熏見一一毛孔念念中
出一切佛刹極微塵數種種莊嚴香樹雲遍法界虛
空界一切如來衆會道場雨於無盡塗香末香衆妙
香藏見一一毛孔念念中出一切佛刹極微塵數種
種衣服雲遍法界虛空界雨衆妙衣普覆莊嚴見一

一毛孔念念中出一切佛刹極微塵數種種繪綵雲
種種雜寶瓔珞雲種種如意寶雲遍法界虛空界一
切如來衆會道場普雨一切瓔珞繪綵令一切眾生
成就愛樂見一一毛孔念念中出一切佛刹極微塵
數種種寶樹雲遍法界虛空界復從一切寶樹藏中
流散一切星宿光雲種種莊嚴於一切如來衆會道
場雨諸妙寶見一一毛孔念念中出一切佛刹極微
塵數種種色界天衆身雲遍法界虛空界歎菩提心
見一一毛孔念念中出一切佛刹極微塵數種種梵
天眷屬身雲請諸如來同轉妙法輪見一一毛孔念
念中出一切佛刹極微塵數欲界天衆身雲守護受
持一切如來所說妙法見一一毛孔念念中出一切
佛刹極微塵數三世一切諸佛刹雲遍法界虛空界
與諸衆生無依止者而作依止無覆護者而作覆護
無歸趣者而作歸趣見一一毛孔念念中出一切佛
刹極微塵數清淨佛刹雲遍法界虛空界一切諸佛
於中出現菩薩衆會清淨道場令一切衆生愛敬信
樂皆得清淨見一一毛孔念念中出一切佛刹極微
塵數淨不淨佛刹雲遍法界虛空界令雜染衆生皆
得清淨見一一毛孔念念中出一切佛刹極微塵數

不淨淨佛刹雲遍法界虛空界令純染衆生皆得清淨見一一毛孔念念中出一切佛刹極微塵數衆生身雲遍法界虛空界隨應教化一切衆生令於阿耨多羅三藐三菩提而得成熟見一一毛孔念念中出一切佛刹極微塵數種種菩薩身雲遍法界虛空界稱揚種種諸佛名號令諸衆生增長善根見一一毛孔念念中出一切佛刹極微塵數種種菩薩身雲遍法界虛空界宣揚顯示諸佛菩薩從初發意嚴淨佛刹所生善根見一一毛孔念念中出一切佛刹極微塵數種種菩薩身雲遍法界虛空界一切佛刹一一刹中爲欲清淨普賢妙行宣揚一切菩薩願海見一一毛孔念念中出一切佛刹極微塵數普賢菩薩行雲令一切衆生愛樂修習速得圓滿一切智體見一一毛孔念念中出一切佛刹極微塵數正覺身雲於一切佛刹現成正覺顯示種智令諸菩薩普集大法速疾增長現前覺悟

大方廣佛華嚴經卷第三十八

校讎

第十五紙

九行相南
藏作想

音釋

需

普蓋切霧
需而貌

瘡疣

瘡初莊切瘡瘻也
疣音尤疣贊也

綵

此宰切
繪繪也

華嚴經普賢行願品第三十八卷願保現生吉祥

如意世世生生常親法寶速至菩提者汝寧北

丘如清對曉寧唐士登書江寧張應榜刻

萬曆辛卯秋五臺山妙德庵識

大方廣佛華嚴經卷第三十九

唐罽賓國三藏般若奉詔譯

入不可思議解脫境界普賢行願品之三十九

爾時善財童子見普賢菩薩如是自在神通境界歡喜踊躍普遍身心重復觀察見普賢菩薩一一身分一一支節一一毛孔悉有三千大千世界其中一切地水火風大海四洲須彌鐵圍及衆寶山國土城邑宮殿園苑乃至地獄餓鬼畜生閻羅王界天龍八部人與非人欲界色界無色界處所有形色日月星宿風雲雷電晝夜月時及以年劫諸佛出世菩薩衆會

道場莊嚴如是等事悉皆明見如見此世界盡於東方種種世界亦復如是如東方南西方四維上下亦復如是如見現在十方世界盡過去際盡未來際種種世界相續不斷亦如是見各各差別互相涉入不相雜亂如於此毗盧遮那如來寶蓮華藏師子座上顯示如是遊戲神通於東方蓮華吉祥世界賢吉祥如來所顯示一切遊戲神通亦復如是如賢吉祥如來所如是盡於東方南西方四維上下一切世界顯示如是十方一切佛刹一一塵中皆有法界諸佛衆會一一佛所皆有普賢坐寶蓮華師子之座顯示一切遊戲神通悉亦如是又於彼一一普賢身中皆見三世一切境界猶如明鏡現其影像所謂一切佛刹一切資具一切衆生一切佛出興一切菩薩道場衆會又聞一切衆生種種音聲一切佛聲一切如來轉法輪聲一切如來遊戲神通聲一切菩薩善誘誨聲一切菩薩神通境界菩薩智通菩薩普集菩薩說法菩薩遊戲如是等聲爾時善財童子見聞普賢菩薩如是無量不可思議遊戲神通卽得十種智波羅蜜何等爲十一者於念念中令身遍滿一切佛刹智波羅蜜二者於念念中悉能往詣一切佛所

智波羅蜜三者於念念中悉能供養一切如來智波羅蜜四者於念念中普於一切諸如來所聞法受持智波羅蜜五者於念念中微細觀察一切如來所有法輪智波羅蜜六者於念念中知一切佛不可思議大神通事智波羅蜜七者於念念中說一句法盡未來際辨才無盡智波羅蜜八者於念念中智海現前觀一切法智波羅蜜九者於念念中得一切法界敎海智波羅蜜十者於念念中得知一切衆生離衆生想智波羅蜜一一於念念中普賢慧行皆現在前智波羅蜜善財童子既得是已普賢菩薩卽申右手摩善財頂善財卽得深入一切佛刹極微塵數諸大三昧各以一切佛刹極微塵數三昧而爲眷屬一一三昧悉得一切昔所未見昔所未聞一切佛刹極微塵數種種世界海諸佛大會增長一切佛刹極微塵數一切智助道具出現一切佛刹極微塵數一切智法門成就一切佛刹極微塵數初發一切智心深入一切佛刹極微塵數一切智大願海出生一切佛刹極微塵數一切智出要道修習一切佛刹極微塵數一切智菩薩行圓滿一切佛刹極微塵數一切智速疾力得一切佛刹極微塵數一切智普光照如此娑婆

世界毗盧遮那佛所普賢菩薩摩善財頂所獲法門
如是十方所有世界及彼世界一一塵中一切世界
一切佛所普賢菩薩悉亦如是摩善財頂所得法門
亦皆同等爾時普賢菩薩摩訶薩告善財言善男子
汝見我此神通力不善財白言聖者唯然已見此不
思議大神通事得佛智慧方能知之普賢菩薩告善
財言善男子我於不可說不可說劫行菩薩行求一
切智一一劫中爲欲清淨菩提心故承事不可說不
可說如來一一劫中爲集一切智福德具故不可說
不可說劫佛刹極微塵數廣大施會一切世間最勝
無比悉皆廻向一切衆生一一劫中爲求一切智法
故以不可說不可說佛刹極微塵數財物而爲大捨
一一劫中爲求佛智故以不可說不可說佛刹極微
塵數國土王位村營城邑聚落宮殿妻子眷屬身分
支節眼耳鼻舌乃至身命而爲布施一一劫中爲求
一切智首故以不可說不可說佛刹極微塵數頭而
爲布施一一劫中爲求一切智故於不可說不可說
佛刹極微塵數諸如來所恭敬尊重承事供養上妙
衣服臥具醫藥一切所須悉皆奉施於其法中出家
學道受持法教隨順修行善男子我於爾所大劫海

中自憶未曾於一念間不順佛教爾所劫中未曾一
念生瞋害心我我所心自他差別心未曾一念離菩
提心於生死中起疲厭心生下劣心懷懶惰心有障
礙心起迷惑心唯住無上不可沮壞一切智性大菩
提心善男子我普嚴淨一切佛土我以大悲救護衆
生教化成熟令其清淨我供養承事一切諸佛諸善
知識於彼諸佛善知識所爲求正法弘宣護持一切
內外悉皆能捨乃至身命亦無所惜如是無量相應
圓滿所行之行一切劫海說其因緣劫海可盡此不
可盡善男子我法海中無有一文一句非是捨施轉
輪王位而求得者非是悉捨一切所有而求得者善
男子我所求法皆爲救護一切衆生念念相續微細
觀察令最勝法速得現前願以智光照明開示一切
世間願爲開示出世間智願令衆生悉得安樂願普
稱讚一切如來所有功德我如是等徃昔圓滿相應
行門於不可說不可說佛刹極微塵數劫海說不可
盡是故善男子我以如是積集助道法力增長諸善
根力廣大極深信力修行諸功德力如實觀察一切
法力成熟一切智慧眼力爲諸如來所加持力種種
大願所引起力無邊大悲不可動力悉能清淨妙智

通力種種善友所攝受力由此等故得此究竟三世平等清淨法身及得無上清淨色身超諸世間而隨衆生種種心樂普爲現形入一切刹遍一切處普能隨順示現神通今諸衆生靡不欣樂善男子汝見我此圓滿廣大威德身不汝應微細思惟觀察善男子我此妙身無邊劫海之所成就無量百千億那由他劫難得出現難得覩見善男子若有衆生未種善根及少善根猶尚不得聞我名字況見我身善男子若有衆生得聞我名皆於阿耨多羅三藐三菩提得不退轉若見若念若迎若送若暫隨逐乃至夢中皆亦如是或有衆生一日一夜憶念於我隨順修行而得成熟或七日七夜半月一月半年一年百年千年一劫百劫乃至不可說不可說佛刹極微塵數劫憶念於我而成熟者或一生或百生乃至不可說不可說佛刹極微塵數生憶念於我而成熟者或見我圓光或見放光或見色身或見神通震動佛刹或生恐怖或生歡喜皆得成熟善男子我以如是等佛刹極微塵數諸方便門令諸衆生於阿耨多羅三藐三菩提得不退轉復次善男子若有衆生見聞於我清淨刹者必得生我清淨刹中若有衆生見聞於我清淨身

者必得生我清淨身中善男子汝應觀我此大威德
清淨之身爾時善財童子微細觀察普賢之身見一
毛孔中有不可說不可說諸佛刹海一一刹海皆
有諸佛出興於世遍滿其中大菩薩衆海會圍遶彼
諸刹海種種建立種種形狀種種莊嚴種種大山周
而圍遶種種色雲彌覆其上種種佛出興種種演說
法如是等事各各不同如一毛孔一切毛孔中一一
相中一一好中一一支節中皆亦如是又見普賢菩
薩於一一世界海中出一切佛刹極微塵數佛變化
身雲周遍十方一切世界教化衆生令於阿耨多羅
三藐三菩提而得成熟時善財童子隨順普賢善誘
誨故入普賢身及毛孔內十方一切諸世界中教化
衆生復次善財童子所見佛刹極微塵數諸善知識
徃詣親近承事供養積集增長一切善根智慧光明
比此暫見普賢菩薩所得善根百分不及一千分不
及一百千分不及一百千億分數分算分喻分優波
尼沙陀分亦不及一善財童子從初發心乃至得見
普賢菩薩於其中間所入刹海相續不斷今於普賢
菩薩一毛孔中一念所入諸佛刹海相續不斷過前
不可說不可說倍如一毛孔一切毛孔悉亦如是善

財童子於普賢菩薩毛孔刹中行一步過不可說不可說佛刹極微塵數世界如是而行盡未來際劫猶不能知一毛孔中種種刹海壞刹海莊嚴所有邊際亦不能知佛海出現相續佛海出現藏佛海差別佛海出生門佛海生佛海滅所有邊際亦不能知菩薩衆會道場海相續菩薩衆海藏菩薩衆海差別菩薩衆海出生門菩薩衆海集菩薩衆海散所有邊際亦不能知入衆生界知衆生根敎化調伏諸衆生界覺悟成熟諸衆生智菩薩所住自在神通菩薩所入諸地諸道如是等海皆悉不知究竟邊際善財童子於普賢毛孔刹中或有刹中一日而行或有刹中一年而行乃至不可說不可說佛刹極微塵數劫如是而行不動不出念念周遍無邊刹海敎化調伏一切衆生令向阿耨多羅三藐三菩提當是之時善財童子則次第得普賢菩薩諸行願海皆悉平等與普賢等與諸佛等一身充滿一切世界等諸行圓滿等正覺現前等神通大用等種種法輪等清淨辯才等出生言辭等種種音聲等諸力無畏等種種佛住等大慈大悲等如是乃至不可思議解脫自在悉皆同等

爾時普賢菩薩摩訶薩觀察一切菩薩衆會及善財童子而說偈言

汝等應離諸疑垢 一心不亂而諦聽

我說如來滿諸度 一切解脫真實道

出世調柔勝丈夫

其心清淨如虛空

常放智日大光明

普照世間除惑暗

如來難可得見聞

無量億劫今乃遇

如優曇華時一現

是故應聽佛功德

隨順世間諸所作

譬如幻士現衆業

但爲悅可衆生心

未曾一念生分別

爾時一切菩薩聞此說已一心渴仰發大誓願欲聞如來真實義諦所有功德咸作是念普賢菩薩諸行已圓體性清淨如說能行如行而說一切如來共所稱讚作是念已深生渴仰爾時普賢菩薩圓滿種種功德智慧莊嚴身心猶如蓮華不著三界一切塵垢告諸菩薩言汝等皆當一心諦聽我今欲說佛功德海一滴之相卽說偈言

佛智廣大同虛空 普遍一切衆生心

了世妄想皆非有 不起種種異分別

一念悉知三世法 亦了一切衆生根

譬如善巧大幻師 念念亦現無邊量

隨諸衆生心行異 往昔諸業願樂力

令其所見各不同 而佛寂然無動念

或有處處見佛坐 充滿十方諸世界

或有其心不清淨 無量劫中不見佛

或有信解心無我 一念發意見如來

或有詭詬不淨心 億劫專求莫能遇

或一切處聞佛音 其音美妙令心悅

或有百千萬億劫 心不淨故不得聞

或見清淨大菩薩 充滿三千大千界

皆已具足普賢行 如來於中儼然坐

或見此界妙無比 佛無量劫所嚴淨

毗盧遮那最勝尊 於中覺悟成菩提

或見蓮華勝妙刹 賢首如來住在中

無量菩薩衆圍繞 皆悉勤修普賢行

或有見佛無量壽 觀自在等共圍繞

悉已住於灌頂地 遍滿十方無量土

或有見此三千界 猶如妙喜具莊嚴

阿閦如來住在中 及如香象諸菩薩

或見月覺大名稱 金剛幢等菩薩俱

住如圓鏡妙莊嚴 普遍十方清淨刹
或見日藏世所尊 住普光明清淨土
與得灌頂諸菩薩 充滿十方而說法
或見金剛大焰佛 與智幢等菩薩俱
周行一切廣大刹 說法除滅衆生暗
一一毛端不可說 諸佛具相三十二
菩薩衆會共圍繞 種種說法度衆生
或見一一佛毛孔 具足莊嚴廣大刹
無量諸佛住其中 清淨佛子皆充滿
或見十方平等刹 而令在一極微中
無量菩薩悉充滿 不可說劫修諸行
或有見一毛端處 無量極微塵刹海
種種業起各差別 毗盧遮那轉法輪
或有世界不清淨 或清淨刹衆寶成
如來住壽無量時 乃至涅槃諸所現
普盡十方諸世界 種種示現不思議
隨諸衆生心智殊 麋不化度令清淨
如是無上大調御 充滿十方國土中
示現種種神通力 我說少分汝當聽
或見釋迦成佛道 已經不可思議劫

或見今始爲菩薩 十方利益諸羣生
或有見此釋師子 供養諸佛修行道
或見人中最勝尊 顯示種種神通事
或見布施或持戒 或忍或進或諸禪
般若方便願力智 隨衆生心皆示現
或見究竟波羅蜜 或見安住於諸地
總持三昧神通智 如是悉現盡無餘
或現修行無量劫 住於菩薩堪忍位
或見住於不退地 或現法水灌其頂
或現梵釋護世身 或現刹利婆羅門
種種色相所莊嚴 猶如幻師現衆像
或現兜率始降神 或見宮中受嬪御
或見棄捨諸榮樂 出離王宮行學道
或見始生或見滅 或示出家學異行
或見坐於菩提樹 摧伏魔軍成正覺
或有見佛始涅槃 或見起塔遍世間
或見塔中立影像 或隨衆生現身色
或見如來無量壽 與諸菩薩授尊記
而成真寶大導師 次補住於安樂刹
或見無量億千劫 作佛事已入涅槃

或見今始成菩提

或見正修諸妙行

或見如來清淨月

在於梵世及魔宮

自在天宮化樂宮

示現種種諸神變

或見在於兜率宮

無量諸天共圍繞

爲彼說法令歡喜

一切淨心供養佛

或見住夜摩天

忉利護世龍神處

如是一切諸宮殿

莫不於中現其像

或於燃燈世尊所

散華布髮爲供養

從是了知深妙法

恒以此道化羣生

或見久遠已涅槃

或見初始成菩提

或見住於無量劫

或見須臾卽滅度

身相光明與壽命

智慧菩提及涅槃

衆會所化威儀聲

如是一一皆無量

或現其身極廣大

譬如須彌大寶山

或見跏趺不動搖

充滿無邊諸世界

或見圓光一尋量

或見千萬億由旬

或照無量國土中

或見充滿一切刹

或見佛壽八十年

或壽百千萬億歲

或住不可思議劫

如是展轉倍過是

佛智通達淨無礙

剎那普了三世法

皆從心識因緣現

生滅無常無自性

於一刹中成正覺

一切利處悉亦然

一切入一一亦爾

隨衆生心而示現

如來安住無上道

成就十力四無畏

圓滿智慧無障礙

轉於十二行法輪

普知苦集及滅道

微細分別緣起法

法義樂說辭無礙

因此無畏廣宣揚

諸法無我無有相

業性不起亦不失

一切遠離如虛空

佛以方便能分別

如來如是轉法輪

普震十方諸國土

宮殿山河悉搖動

不使衆生有驚怖

如來普演廣大音

隨其根欲皆令解

悉使發心除惑垢

而佛未始生心念

或聞施戒忍精進

禪定般若方便智

或聞慈悲及喜捨

種種言詞差別聲

或聞四念四正勤

神足根力覺支道

諸念神通止觀等

無量方便諸法門

龍神八部人非人

梵釋護世諸天衆

佛以一音爲說法

隨其品類皆令解

或有貪欲瞋恚癡

忿覆慳嫉及驕詭

八萬四千煩惱異

令其聞說對治門

若白淨法未修治

令其聞說十學處

已能布施調伏者

令聞寂滅涅槃音

若人志劣無慈愍

厭惡生死自求離

令其聞說三脫門

使得出苦涅槃樂

若有自性少諸欲

獸背三有求寂靜

令其聞說諸緣起

依獨覺乘而出離

若有清淨廣大心

圓滿施戒諸功德

親近如來具慈愍

令其聞說大乘音

或有國土聞一乘

或二或三或四五

如是乃至無有量

悉是如來方便力

涅槃寂靜無差別

智行勝劣有殊異

譬如虛空體性一

鳥飛遠近各不同

佛體音聲亦如是

普遍一切虛空界

隨諸衆生心智殊

所聞所見各差別

佛以過去修諸行

能隨所樂演妙音

無心繫念此與彼

我爲誰說誰不說

如來面門放大光

具足八萬四千數

所說法門亦如是

普照於世除煩惱

圓滿清淨功德智

而常隨順三世間

猶如虛空無染著 爲衆生故而顯示
示有生老病死苦 亦示住壽處於世
雖順世間如是現 體性清淨如虛空
一切國土無有邊 衆生根樂亦無量
如來智眼皆明見 隨所應化示佛道
究竟十方虛空界 所有人天大衆中
隨其形相各不同 佛現其身亦如是
若在沙門大衆會 剃除鬚髮服袈裟
執持衣鉢護諸根 令其歡喜息煩惱
若時親近婆羅門 則爲示現羸瘦身
執杖持瓶恒潔淨 具足智慧巧談說
吐故納新自充飽 吸風飲露無異食
或坐或立不動搖 現諸苦行摧異道
或持彼戒爲世師 善達醫方等諸論
書數天文地衆相 及身休咎無不了
深入諸禪及解脫 三昧神通智慧行
言談諷詠共嬉戲 方便皆令住佛道
或現上服以嚴淨 首戴華冠蔭高蓋
四兵前後共圍繞 誓衆宣威伏小王
或爲聽訟斷獄官 懲惡勸善多方便

所有與奪皆明審

令其欣敬盡欽承

或作輔弼諸大臣

善用諸王治正法

十方利益皆周遍

了達世間無有餘

或爲粟散諸小王

或作飛行轉輪帝

令諸王子姝女衆

悉皆受化奉修行

或作護世四天王

或作夜叉龍等主

各爲其衆而說法

一切皆令大欣慶

或作忉利大天王

住善法堂歡喜園

首戴華冠說妙法

諸天觀仰無能測

或住夜摩兜率天

化樂自在魔王所

居處摩尼寶宮殿

說真實行令調伏

或至梵天衆會中

說四無量諸禪道

普令歡喜便捨去

而莫知其往來相

或至阿迦尼吒天

爲說覺分諸寶華

及餘無量聖功德

然後捨去無知者

如來無礙智所見

其中一切諸衆生

悉以無邊方便門

種種教化令成熟

譬如幻師善幻術

現作種種諸幻事

佛化衆生亦如是

爲其示現種種身

如淨月輪在虛空

令世衆生見盈缺

一切河池現影像

所有星宿奪光色

如來智月出世間

亦以方便示增減

菩薩心水現影像

二乘星宿無光色

譬如大海寶充滿

清淨無濁無有邊

四洲所有諸衆生

一切於中現其像

佛身功德海亦爾

無垢無濁量無邊

乃至法界諸衆生

靡不於中現其像

譬如淨日放千光

不動本處遍十方

佛日光明亦如是

無去無來除世暗

譬如龍王降大雨

不從身出及心出

而能霑洽悉周遍

滌除炎熱使清涼

如來法雨亦復然

不從於佛身心出

而能開悟諸含識

盡能滅除三毒火

如來清淨妙法身

一切三界無倫匹

超出世間言語道

本性非有亦非無

雖無所依無不依

如是無來亦無去

如空如日亦如夢

當於佛體如是觀

三界有無一切法

不能與佛爲譬喻

譬如山林鳥獸等

無有依空而住者

大海摩尼無量色

佛身差別亦復然

如來非色非非色

隨應而現無所住

虛空真如及實際

涅槃法性寂滅等

唯有如是真實法

可以顯示於如來

刹塵心念可數知

大海中水可飲盡

虛空可量風可繫

無人能說佛功德

若有聞斯功德海

能生歡喜信樂心

如所稱揚悉當得

慎勿於此生疑念

大方廣佛華嚴經卷第三十九

音釋

惄

良別切
斬惜也

嬪

娘賓切
妃嬪也

慳嫉

堅丘閒切
憊也

憊

堅丘閑切
憊也

憊

堅丘閑切
憊也

憊

現去聲

是

女弟子

沈氏

施刻

華嚴經

普賢行願

願

第

三十九

卷

九

願

現

生

常

大方廣佛華嚴經卷第四十

唐罽賓國三藏般若奉詔譯

入不思議解脫境界普賢行願品之四十

爾時普賢菩薩摩訶薩稱歎如來勝功德已告諸菩薩及善財言善男子如來功德假使十方一切諸佛經不可說不可說佛刹極微塵數劫相續演說不可窮盡若欲成就此功德門應修十種廣大行願何等爲十一者禮敬諸佛二者稱讚如來三者廣修供養四者懺悔業障五者隨喜功德六者請轉灋輪七者請佛住世八者常隨佛學九者恒順眾生十者普皆

迴向善財白言大聖云何禮敬乃至迴向普賢菩薩
告善財言善男子言禮敬諸佛者所有盡灑界虛空
界十方三世一切佛刹極微塵數諸佛世尊我以普
賢行願力故深心信解如對目前悉以清淨身語意
業常修禮敬一一佛所皆現不可說不可說佛刹極
微塵數身一身偏禮不可說不可說佛刹極微塵
數佛虛空界盡我禮乃盡以虛空界不可盡故我此
禮敬無有窮盡如是乃至衆生界盡衆生業盡衆生
煩惱盡我禮乃盡而衆生界乃至煩惱無有盡故我
此禮敬無有窮盡念念相續無有間斷身語意業無
有疲厭復次善男子言稱讚如來者所有盡灑界虛
空界十方三世一切刹土所有極微一一塵中皆有
一切世間極微塵數佛一一佛所皆有菩薩海會圍
遶我當悉以甚深勝解現前知見各以出過辯才天
女微妙舌根一一舌根出無盡音聲海一一音聲出
一切言辭海稱揚讚歎一切如來諸功德海窮未來
際相續不斷盡於灑界無不周遍如是虛空界盡衆
生界盡衆生業盡衆生煩惱盡我讚乃盡而虛空界
乃至煩惱無有盡故我此讚歎無有窮盡念念相續
無有間斷身語意業無有疲厭復次善男子言廣修

供養者所有盡灑界虛空界十方三世一切佛刹極
微塵中一一各有一切世界極微塵數佛一一佛所
種種菩薩海會圍遶我以普賢行願力故起深信解
現前知見悉以上妙諸供養具而爲供養所謂華雲
鬢雲天音樂雲天傘蓋雲天衣服雲天種種香塗香
燒香末香如是等雲一一量如須彌山王然種種燈
酥燈油燈諸香油燈一一燈炷如須彌山一一燈油
如大海水以如是等諸供養具常爲供養善男子諸
供養中灑供養最所謂如說修行供養利益衆生供
養攝受衆生供養代衆生苦供養勤修善根供養不
捨菩薩業供養不離菩提心供養善男子如前供養
無量功德比灑供養一念功德百分不及一千分不
及一百千俱胝那由他分迦羅分算分數分喻分優
波尼沙陀分亦不及一何以故以諸如來尊重灑故
就供養如來如是修行是真供養故此廣大最勝供
養虛空界盡衆生界盡衆生業盡衆生煩惱盡我供
乃盡而虛空界乃至煩惱不可盡故我此供養亦無
有盡念念相續無有間斷身語意業無有疲厭復次
善男子言懺除業障者菩薩自念我於過去無始劫

中由貪瞋癡發身口意作諸惡業無量無邊若此惡業有體相者盡虛空界不能容受我今悉以清淨三業偏於灑界極微塵刹一切諸佛菩薩眾前誠心懺悔後不復造恒住淨戒一切功德如是虛空界盡眾生界盡眾生業盡眾生煩惱盡我懺乃盡而虛空界乃至眾生煩惱不可盡故我此懺悔無有窮盡念念相續無有間斷身語意業無有疲厭復次善男子言隨喜功德者所有盡灑界虛空界十方三世一切佛刹極微塵數諸佛如來從初發心爲一切智勤修福聚不惜身命經不可說不可說佛刹極微塵數劫一劫中捨不可說不可說佛刹極微塵數頭目手足如是一切難行苦行圓滿種種波羅蜜門證入種種菩薩智地成就諸佛無上菩提及般涅槃分布舍利所有善根我皆隨喜及彼十方一切世界六趣四生一切種類所有功德乃至一塵我皆隨喜十方三世一切聲聞及辟支佛有學無學所有功德我皆隨喜一切菩薩所修無量難行苦行志求無上正等菩提廣大功德我皆隨喜如是虛空界盡眾生界盡眾生業盡眾生煩惱盡我此隨喜無有窮盡念念相續無有間斷身語意業無有疲厭復次善男子言請轉灑

輪者所有盡灑界虛空界十方三世一切佛刹極微塵中一一各有不可說不可說佛刹極微塵數廣大佛刹一一刹中念念有不可說不可說佛刹極微塵數一切諸佛成等正覺一切菩薩海會圍遶而我悉以身口意業種種方便殷勤勸請轉妙灑輪如是虛空界盡衆生界盡衆生業盡衆生煩惱盡我常勸請一切諸佛轉正灑輪無有窮盡念念相續無有間斷身語意業無有疲厭復次善男子言請佛住世者所有盡灑界虛空界十方三世一切佛刹極微塵數諸佛如來將欲示現般涅槃者及諸菩薩聲聞緣覺有學無學乃至一切諸善知識我悉勸請莫入涅槃經於一切佛刹極微塵數劫爲欲利樂一切衆生如是虛空界盡衆生界盡衆生業盡衆生煩惱盡我此勸請無有窮盡念念相續無有間斷身語意業無有疲厭復次善男子言常隨佛學者如此娑婆世界毗盧遮那如來從初發心精進不退以不可說不可說身命而爲布施剝皮爲紙析骨爲筆刺血爲墨書寫經典積如須彌爲重灑故不惜身命何況王位城邑聚落宮殿園林一切所有及餘種種難行苦行乃至樹下成大菩提示種種神通起種種變化現種種佛身

處種種衆會或處一切諸大菩薩衆會道場或處聲聞及辟支佛衆會道場或處轉輪聖王小王眷屬衆會道場或處刹利及婆羅門長者居士衆會道場乃至或處天龍八部人非人等衆會道場處於如是種種衆會以圓滿音如大靄震隨其樂欲成熟衆生乃至示現入於涅槃如是一切我皆隨學如今世尊毗盧遮那如是盡灑界虛空界十方三世一切佛刹所有塵中一切如來皆亦如是於念念中我皆隨學如是虛空界盡衆生界盡衆生業盡衆生煩惱盡我此隨學無有窮盡念念相續無有間斷身語意業無有疲厭復次善男子言恒順衆生者謂盡灑界虛空界十方刹海所有衆生種種差別所謂卵生胎生濕生化生或有依於地水火風而生住者或有依空及諸卉木而生住者種種生類種色身種種形狀種種相貌種種壽量種種族類種種名號種種心性種種知見種種欲樂種種意行種種威儀種種衣服種種飲食處於種種村落城邑宮殿乃至一切天龍八部人非人等無足二足四足多足有色無色有想無想非有想非無想如是等類我皆於彼隨順而轉種種承事種種供養如敬父母如奉師長及阿羅漢

乃至如來等無有異於諸病苦爲作良醫於失道者示其正路於闇夜中爲作光明於貧窮者令得伏藏菩薩如是平等饒益一切衆生何以故菩薩若能隨順衆生則爲隨順供養諸佛若於衆生尊重承事則爲尊重承事如來若令衆生生歡喜者則令一切如來歡喜何以故諸佛如來以大悲心而爲體故因於衆生而起大悲因於大悲生菩提心因菩提心成等正覺譬如曠野沙磧之中有大樹王若根得水枝葉華果悉皆繁茂生於曠野菩提樹王亦復如是一切衆生而爲樹根諸佛菩薩而爲華果以大悲水饒益衆生則能成就諸佛菩薩智慧華果何以故若諸菩薩以大悲水饒益衆生則能成就阿耨多羅三藐三菩提故是故菩提屬於衆生若無衆生一切菩薩終不能成無上正覺善男子汝於此義應如是解以於衆生心平等故則能成就圓滿大悲以大悲心隨衆生故則能成就供養如來菩薩如是隨順衆生虛空界盡衆生界盡衆生業盡衆生煩惱盡我此隨順無有窮盡念念相續無有間斷身語意業無有疲厭復次善男子言普皆迴向者從初禮拜乃至隨順所有功德皆悉迴向盡灑界虛空界一切衆生願令衆生

常得安樂無諸病苦欲行惡灑皆悉不成所修善業
皆速成就關閉一切諸惡趣門開示人天涅槃正路
若諸眾生因其積集諸惡業故所感一切極重苦果
我皆代受令彼眾生悉得解脫究竟成就無上菩提
菩薩如是所修迴向虛空界盡眾生界盡眾生業盡
衆生煩惱盡我此迴向無有窮盡念念相續無有間
斷身語意業無有疲厭善男子是爲菩薩摩訶薩十
種大願具足圓滿若諸菩薩於此大願隨順趣入則
能成熟一切衆生則能隨順阿耨多羅三藐三菩提
則能成滿普賢菩薩諸行願海是故善男子汝於此
義應如是知若有善男子善女人以滿十方無量無
邊不可說不可說佛刹極微塵數一切世界上妙七
寶及諸人天最勝安樂布施爾所一切世界所有眾
生供養爾所一切世界諸佛菩薩經爾所佛刹極微
塵數劫相續不斷所得功德若復有人聞此願王一
經於耳所有功德比前功德百分不及一千分不及
一乃至優波尼沙陀分亦不及一或復有人以深信
心於此大願受持讀誦乃至書寫一四句偈速能除
滅五無間業所有世間身心等病種種苦惱乃至佛
刹極微塵數一切惡業皆得銷除一切魔軍夜叉羅

刹若鳩槃茶若毗舍闍若部多等飲血啖肉諸惡鬼
神皆悉遠離或時發心親近守護是故若人誦此願
者行於世間無有障礙如空中月出於雲翳諸佛菩
薩之所稱讚一切人天皆應禮敬一切眾生悉應供
養此善男子善得人身圓滿普賢所有功德不久當
如普賢菩薩速得成就微妙色身具三十二大丈夫
相若生入天所在之處常居勝族悉能破壞一切惡
趣悉能遠離一切惡友悉能制伏一切外道悉能解
脫一切煩惱如師子王摧伏羣獸堪受一切眾生供
養又復是人臨命終時最後刹那一切諸根悉皆散
壞一切親屬悉皆捨離一切威勢悉皆退失輔相大
臣宮城內外象馬車乘珍寶伏藏如是一切無復相
隨唯此願王不相捨離於一切時引導其前一刹那
中卽得往生極樂世界到已卽見阿彌陀佛文殊師
利菩薩普賢菩薩觀自在菩薩彌勒菩薩等此諸菩
薩色相端嚴功德具足所共圍遶其人自見生蓮華
中蒙佛授記得授記已經於無數百千萬億那由他
劫普於十方不可說不可說世界以智慧力隨眾生
心而爲利益不久當坐菩提道場降伏魔軍成等正
覺轉妙法輪能令佛刹極微塵數世界衆生發菩提

心隨其根性敍化成熟乃至盡於未來劫海廣能利益一切衆生善男子彼諸衆生若聞若信此大願王受持讀誦廣爲人說所有功德除佛世尊餘無知者是故汝等聞此願王莫生疑念應當諦受受已能讀讀已能誦誦已能持乃至書寫廣爲人說是諸人等於一念中所有行願皆得成就所獲福聚無量無邊能於煩惱大苦海中拔濟衆生令其出離皆得往生阿彌陀佛極樂世界爾時普賢菩薩摩訶薩欲重宣此義普觀十方而說偈言

所有十方世界中

三世一切人師子

我以清淨身語意

一切偏禮盡無餘

普賢行願威神力

普現一切如來前

一身復現刹塵身

一一偏禮刹塵佛

於一塵中塵數佛

各處菩薩衆會中

無盡淨界塵亦然

深信諸佛皆充滿

各以一切音聲海

普出無盡妙言辭

盡於未來一切劫

讚佛甚深功德海

以諸最勝妙華鬘

伎樂塗香及傘蓋

如是最勝莊嚴具

我以供養諸如來

最勝衣服最勝香

末香燒香與燈燭

一一皆如妙高聚

我悉供養諸如來

我以廣大勝解心

深信一切三世佛

悉以普賢行願力

普偏供養諸如來

我昔所造諸惡業

皆由無始貪瞋癡

從身語意之所生

一切我今皆懺悔

十方一切諸眾生

二乘有學及無學

一切如來與菩薩

所有功德皆隨喜

十方所有世間燈

最初成就菩提者

我今一切皆勸請

轉於無上妙法輪

諸佛若欲示涅槃

我悉至誠而勸請

唯願久住刹塵劫

利樂一切諸眾生

所有禮讚供養福

迴向眾生及佛道

隨喜懺悔諸善根

修習普賢圓滿行

我隨一切如來學

及與現在十方佛

供養過去諸如來

未來一切天人師

速得成就大菩提

我願普隨三世學

廣大清淨妙莊嚴

衆會圍遶諸如來

悉在菩提樹王下

十方所有諸衆生

願離憂患常安樂

獲得甚深正灋利

滅除煩惱盡無餘

我爲菩提修行時

一切趣中成宿命

常得出家修淨戒

無垢無破無穿漏

天龍夜叉鳩槃荼

乃至人與非人等

所有一切衆生語

悉以諸音而說灋

勤修清淨波羅蜜

恒不忘失菩提心

滅除障垢無有餘

一切妙行皆成就

於諸惑業及魔境

世間道中得解脫

猶如蓮華不著水

亦如日月不住空

悉除一切惡道苦

等與一切羣生樂

如是經於刹塵劫

十方利益恒無盡

我常隨順諸衆生

盡於未來一切劫

恒修普賢廣大行

圓滿無上大菩提

所有與我同行者

於一切處同集會

身口意業皆同等

一切行願同修學

所有益我善知識

爲我顯示普賢行

常願與我同集會

於我常生歡喜心

願常面見諸如來

及諸佛子衆圍達

於彼皆興廣大供

盡未來劫無疲厭

願持諸佛微妙灋

光顯一切菩提行

究竟清淨普賢道　　盡未來劫常修習
我於一切諸有中　　所修福智恒無盡

定慧方便及解脫　　獲諸無盡功德藏
一塵中有塵數刹　　一一刹有難思佛

一一佛處衆會中　　我見恒演菩提行
普盡十方諸刹海　　一一毛端三世海

佛海及與國土海　　我徧修行經劫海

一切如來語清淨　　一言真衆音聲海

隨諸衆生意樂音　　一一流佛辯才海

三世一切諸如來　　於彼無盡語言海
恒轉理趣妙灑輪　　我深智力普能入

我能深入於未來　　盡一切劫爲一念
三世所有一切劫　　爲一念際我皆入

我於一念見三世　　所有一切人師子
亦常入佛境界中　　如幻解脫及威力

於一毛端極微中　　出現三世莊嚴刹
十方塵刹諸毛端　　我皆深入而嚴淨

所有未來照世燈　　成道轉灑悟羣有
究竟佛事示涅槃　　我皆往詣而親近

速疾周徧神通力　　普門徧入大乘力

智行普修功德力

威神普覆大慈力

徧淨莊嚴勝福力

無著無依智慧力

定慧方便威神力

普能積集菩提力

清淨一切善業力

摧滅一切煩惱力

降伏一切諸魔力

圓滿普賢諸行力

普能嚴淨諸刹海

解脫一切衆生海

善能分別諸灑海

能甚深入智慧海

普能清淨諸行海

圓滿一切諸願海

親近供養諸佛海

修行無倦經劫海

三世一切諸如來

最勝菩提諸行願

我皆供養圓滿修

以普賢行悟菩提

一切如來有長子

彼名號曰普賢尊

我今迴向諸善根

願諸智行悉同彼

願身口意恒清淨

諸行刹土亦復然

如是智慧號普賢

願我與彼皆同等

我爲徧淨普賢行

文殊師利諸大願

滿彼羣盡無餘

未來際劫恒無倦

我所修行無有量

獲得無量諸功德

安住無量諸行中

了達一切神通力

文殊師利勇猛智

普賢慧行亦復然

我今迴向諸善根 隨彼一切常修學

三世諸佛所稱歎 如是最勝諸大願

我今迴向諸善根 爲得普賢殊勝行

願我臨欲命終時 盡除一切諸障礙

面見彼佛阿彌陀 卽得往生安樂刹

我既往生彼國已 現前成就此大願

一切圓滿盡無餘 利樂一切眾生界

彼佛衆會咸清淨 我時於勝蓮華生

親覩如來無量光 現前授我菩提記

蒙彼如來授記已 化身無數百俱胝

智力廣大徧十方 普利一切眾生界

乃至虛空世界盡 與生及業煩惱盡

如是一切無盡時 我願究竟恒無盡

十方所有無邊刹 莊嚴衆寶供如來

最勝安樂施天人 經一切刹微塵劫

若人於此勝願王 一經於耳能生信

求勝菩提心渴仰 獲勝功德過於彼

卽常遠離惡知識 永離一切諸惡道

速見如來無量光 具此普賢最勝願

此人善得勝壽命 此人善來人中生

此人不久當成就

如彼普賢菩薩行
往昔由無智慧力

所造極惡五無間
誦此普賢大願王

一念速疾皆消滅

族姓種類及容色

相好智慧威圓滿

諸魔外道不能摧

堪爲三界所應供

速詣菩提大樹王

坐已降伏諸魔衆

成等正覺轉灑輪

普利一切諸含識

若人於此普賢願

讀誦受持及演說

果報唯佛能證知

決定獲勝菩提道

若人誦此普賢願

我說少分之善根

一念一切悉皆圓

成就眾生清淨願

我此普賢殊勝行

無邊勝福皆迴向

衆普願沈溺諸衆生

速往無量光佛刹

爾時普賢菩薩摩訶薩於如來前說此普賢廣大願
王清淨偈已善財童子踊躍無量一切菩薩皆大歡喜如來讚言善哉善哉爾時世尊與諸聖者菩薩摩訶薩演說如是不可思議解脫境界勝灘門時文殊師利菩薩而爲上首諸大菩薩及所成熟六千比丘彌勒菩薩而爲上首賢劫一切諸大菩薩無垢普賢菩薩而爲上首一生補處住灌頂位諸大菩薩及餘

十方種種世界普來集會一切利海極微塵數諸菩薩摩訶薩衆大智舍利弗摩訶目犍連等而爲上普諸大聲聞并諸人天一切世主天龍夜叉乾闥婆阿修羅迦樓羅緊那羅摩睺羅伽人非人等一切大衆聞佛所說皆大歡喜信受奉行

大方廣佛華嚴經卷第四十

南天竺烏奈國深信最勝善逝灑者修行最勝大乘行者吉祥自在作清淨師子王上獻摩訶支那大唐國大吉祥天子大自在師子中大王手自書寫大方廣佛華嚴經百千偈中所說善財童子親近承事佛刹極微塵數善知識行中五十五聖者善知識入不思議解脫境界普賢行願品謹奉進上伏願大國聖王福聚高大超須彌山智慧深廣過四大海十方國土通爲一家及書此經功德願集彼無量福聚等虛空界一切世界海無盡衆生不可思議真善知識咸生歡喜得佛廣大普光明照離諸貪著成就無垢普賢菩薩最勝行願伏願書此大乘經典進奉功德慈氏如來成佛之時龍華會上早得奉觀大聖天王獲宿命智瞻見便識同

受佛記盡虛空徧灑界廣度未來一切眾生速得成佛

貞元十一年十一月十八日進奉梵夾十二年六月五日奉詔於長安崇福寺譯十四年二月二十四日譯畢進上

罽賓國三藏賜紫沙門般若宣梵文

東都天宮寺沙門廣濟譯語

西明寺賜紫沙門圓照筆受

保壽寺沙門智果迴紋

保壽寺沙門智通迴紋

成都府正覺寺沙門道弘潤文

章敬寺沙門鑒虛潤文

大覺寺沙門道章校勘證義

千福寺沙門大通證禪義

太原府崇福寺沙門澄觀詳定

千福寺沙門虛遠詳定

專知官右神策軍散兵馬使衙前馬軍正將兼押衙特進行鄧州司灑參軍南珍貢右神策軍護軍中尉兼右街功德使元從興元元從雲麾將軍右監門衛大將軍知

内侍省事上柱國交城縣開國男食邑三百戶臣霍仙鳴

左神策軍護軍中尉兼左衛功德使元從興元元從驃騎大將軍行左監門衛大將軍知內侍省事上柱國邠國公食邑三千

戶臣竇文場等進

校讎

第十一紙

二行福流通本作佛

第十三紙

十三行威神流通本作諸威

十四紙

三行行流通本作慧

音釋

矚

之欲切祝也覩也

拊

皮樂六切拊手也

兢惕

兢居陵切兢懼也咱

徒

孫性莖性枝共施鉢貴刻此

五臺

山華嚴菴比丘真嚴真義徒如寬如忍如可

大方廣佛華嚴經行願品第四十卷奉薦

大

方廣佛華嚴經行願品第四十卷奉薦

圓寂

師祖古檀香公伏願藉此功勳掉臂苦樂之

關遊戲聖

凡之城作佛長子紹種願王附緣比丘

明禪清揀王虎優婆塞韓義金優婆夷陳氏王

沙彌如清對性淨覆對吳門徐普

同登解脱之門

共入毗盧之海洪以忠刻

沙彌如清對性淨覆對吳門徐普

萬曆庚寅夏五臺山妙德菴識

豫章



大
開
闢
古
昔
有
余
萬
物
指
萬
物
皆
吉
樂
正
臺
山
華
蓋
恭
正
真
靈
真
美
出
吸
真
氣
不
吸
也

会沙

赴

時

中

身

也

林

世

也

萬

物

也

指

萬

物

也

皆

吉

樂

正

臺

山

也

三
八